

Tti Jian Joajné Jesucristo Que Dicjin Juan

Tti Palabra que Dios nichja conchjian ná xí

¹ Are cainxin coexinhi vehe, ovehe Xenhe Dios tti dinhi Palabra que Dios nichja, co jehe mé vehe ngain Dios, co jehe ján Dios. ² Are mé jehe ovehe ngain Dios. ³ Co de ixin jehe mé, Dios joinchechjian cainxin cosa; xonhi cosa que jí que jeha Dios joinchechjian de ixin jehe mé. ⁴ Co jehe mé tti danjo vida, co are chojni ditticaon ngain jehe mé, vida jihi inchin joadingasán para ixin cain chojni. ⁵ Co joadingasán jihi jinchengasán ngain tti jí naxin xehe, co tti naxin xehe ttixinha ncheganga jehe joadingasán mé.

⁶ Co Dios coinchiehe ná xí que vinhi Juan. ⁷ Co xí mé vehe xa ná testigo para nichja xa de ixin jehe joadingasán mé para que cain chojni rroguitticaon na de ixin jehe tti nichja xí mé. ⁸ Juan jeha jehe tti joadingasán, jehe jeho ná testigo que jói para nichja ndoa de ixin joadingasán mé. ⁹ Tti mero joadingasán que nchengasenhe cain chojni, ojittí ngataha nontte ngain tiempo mé.

¹⁰ Co jehe Xenhe Dios, tti dinhi Palabra que Dios nichja, vehe ngataha nontte, co masqui jehe joinchechjian nontte, chojni ngataha nontte joatsoanha na jehe. ¹¹ Jehe jói ngain nacioen pero chojni de nacioen vayeha na. ¹² Pero ixinha mé, icanxin chojni vayé na jehe co vitticaon na. Co ngain chojni jihi jehe joanjo joachaxin de dinhi na

xenhe Dios. ¹³ Co jehe na jeha inchin xenhe ná ndodaha de ngataha nontte nntihi que doan inchin cain chojni, co jeha ixin ná xí joinao ná nchí, o ixin ná xí joinao concjihi xenhe; jehe na jeha jamé na, jehe na mero xenhe Dios ixin Dios ndačo jañá.

¹⁴ Co jehe Xenhe Dios, tti dinhi Palabra que Dios nichja, conchjian ná xí co vehe ngayá na, co jehe anto rinao cainxin chojni, co jehe chonxin cainxin tti ndoa. Co janha na vicon na tti joachaxin que jehe chonda ixin jehe tti nacoaxinxon Xenhe Ndodá na que ttjen ngajni. ¹⁵ Juan nichja jian de ixin jehe xí mé, co ndačo:

—Xí jiji tti janha vandačhjan are ndačhjan que jehe tti tsí después de janha, mé tti icha importante que janha ixin ovehe icha saho que janha.

¹⁶ Jehe chonda cainxin tti jian co cain ján na dayé na tti jian mé cada nchanho ixin jehe nttanchaon na. ¹⁷ Tti ley de Dios vayé na de ixin Moisés, pero tti rinao na cain chojni co tti ndoa, cayoi mé ttixin de ngain Jesucristo. ¹⁸ xonhi tiempo ná chojni vicon Dios. Pero tti nacoaxinxon Xenhe Dios que jí ngain jehe chonxin Xan jian ngain jehe, co Xan mé Xan jointtagatsoan na de ixin Dios.

*Tti ndačo Juan que vancheguitte chojni
(Mt. 3.11-12; Mr. 1.7-8; Lc. 3.15-17)*

¹⁹ Chojni judío que vinttechonda joachaxin ngain Jerusalén rroanha na canxion dána co canxion xí que vinttechonda xa xa ngain nihngo icha importante. Rroanha na chojni mé ngain Juan, tti vancheguitte chojni, para joanchianguihi na ixin quensen jehe. ²⁰ Co jehe ndačo claro:

—Janha jeha Cristo na tti Dios rroanha.

²¹ Cottimeja cjan na joanchianguihi na:

—¿Quensen jaha remé? ¿Ajaha tti profeté Dios dinhi Elías?

Co Juan ndačo:

—Nahi, jeha janha.

Cottimeja joanchianguihi na:

—¿Quexén remé? ¿Ajaha tti profeté Dios que Moisés ndačo que tsí?

Co Juan ndačo:

—Nahi.

²² Cottimeja ndache na:

—¿Quensen jaha remé? Ixin chonda na que rronhattjan na tti chojni que rroanha na nttihi tti rrondačo jaha. ¿Quehe rrondachjenji ni ra ixin quensen jaha remé?

²³ Juan ndačo:

—Profeta Isaías nichja de ixin janha are jehe ndačo que tsinhi ra tté ná chojni que toyaoxin de ngagaha jna que rrondačo: “Danttjehe ra ná nttiha nao para ixin jehe tti chonda cain joachaxin.”

²⁴ Co chojni mé xifariseo rroanha na para joanchianguihi na Juan cain mé. ²⁵ Co jehe na ndačo na ngain:

—Mexinxin, si jeha jaha tti Cristo que Dios rrorroanha, ni jeha Elías, ni jeha tti profeté Dios, ¿quedonda ncheguitte chojni?

²⁶ Juan ndačo:

—Janha nttaguitte chojni conixin jinda, pero de ngayá ján na xo judío na jí ná chojni que chonxinha ra. ²⁷ Chojni mé tsí después de janha masqui jehe icha importante que janha. Co janha jiquininxinha na ni siquiera tsonxindangá corrié catté.

²⁸ Cain jihi conhe ngain tti lugar que dinhi Betábara, que jí lado çhinxin nchanho de río Jordán, tti vancheguittexin Juan chojni.

Jesús cjoí inchin coleco para ixin Dios

²⁹ Ndoexin Juan vicon Jesús jitonchienhe ngain jehe, co Juan ndaço:

—Tsjenxin ra, xí jihi inchin tti coleco que xanjo para ngain Dios ixin jehe xa sanjo xa cuerpoe xa inchin ná coleco para tsjenga xa hna cain cosa jianha que nchehe chojni ngataha nontte. ³⁰ Janha nichja de ixin jehe xa are ndaçhjan: “Después de janha, tsí iná xí co jehe xa icha importante xa que janha ixin ovehe xa icha saho que janha.” ³¹ Janha mismo venonaha quexehe xí mé, pero janha joihi para jointtaguitte chojni conixin jinda para que chojni judío satsoan na jehe xí jihi.

³² Cai ndaço Juan:

—Janha vicon Espíritu Santo xincanjinxin de ngajni inchin ná conttoanajni, co vittohe ngataha jehe xí jihi. ³³ Hasta ngain nchanho mé, janha xa venonaha quensen jehe xa, pero Dios, tti co-tonna para jointtaguitte chojni conixin jinda, jehe ndachjenji na: “Are sicon Espíritu Santo rrox-incanji co sittohe ngataha ná xí, xí mé tti sincheguittexin chojni conixin Espíritu Santo.” ³⁴ Janha ovicon xí mé, co janha ná testigo na de ixin jehe xí mé que jehe xa ndoa tti Xenhe Dios.

Tti saho chojni que vacao Jesús

³⁵ Ndoexin nttiha vehe Juan iná conixin yó xí que vacao. ³⁶ Co are vicon Juan vatto Jesús, ndaço Juan:

—Tsjenxin ra, yá tti inchin coleco que xanjo para ngain Dios.

³⁷ Tti yó xí que vacao Juan coinhi xa tti ndačo, co sarroé xa Jesús. ³⁸ Cottimeja Jesús tsjehe tti joixin, co vicon ixin terroé cayoi xí mé, co ndačo ngain xa:

—¿Quehe tettjé ra?

Jehe xa vinttendačo xa:

—Maestro, ¿quettinó rrihi?

³⁹ Jesús ndačo:

—Xăcoi ra sitsjehe ra.

Cottimeja vinttecji cayoi xí mé para vintteguicon xa quettinó vehe Jesús co ngoixin rato mé nttiha tavintte xa ngain Jesús hasta ndajoexin nchanho mé ixin hora mé cjoí inchin nó hora tsocjin.

⁴⁰ Ná de jehe tti yó xí que vinttequinhi tti ndačo Juan co sarroé xa Jesús, ná de jehe xa vinhi xa Andrés, co mé cjoí xanchó Simón Pedro. ⁴¹ Andrés ixonhi chonhe, jehe sacjoi joicjé Simón, xanchó jehe Andrés, co ndačo ngain Simón:

—Vittja na tti Mesías.

Co Mesías rročo Cristo tti Dios rroanha.

⁴² Cottimeja Andrés joicao Simón tti jí Jesús, co are Jesús vicon Simón, ndačo ngain:

—Jaha dinhi Simón, xitsihi Jonás, pero jai jaha sinhi Cefas.

Co Cefas rročo xajeho Pedro ixin nguigoa griego; co cayoi nombre yá rročo xo.

Jesús vayé Felipe co Natanael

⁴³ Ndoexin Jesús xaxaon para que jehe cjoí ngain nonttehe Galilea, pero ícha saho jehe vetan Felipe, co ndačo Jesús ngain:

—Xacoi chjin na.

⁴⁴ Co Felipe mé joixin de ngain rajna Betsaida, xajeho rajné Andrés co Pedro. ⁴⁵ Cottimeja cjoí Felipe joicjé Natanael, co ndačo ngain:

—Janha na vicon na tti xí que dicjin Moisés de ixin xí mé ngain libroe ley, co dicjin cainxin profeta de ixin xí mé cai. Jehe Jesús, xitsihi José, rajné Nazaret.

⁴⁶ Ndačo Natanael:

—¿Apoco nchao sačhjexin ná xí jian de ngain Nazaret?

Felipe ndačo:

—Xacoi sitsjehe.

⁴⁷ Are Jesús vicon que Natanael jitonchienne, Jesús ndačo:

—Nttihi joí ná xí mero chojni Israel co xí jihi xonhi chojni ncheyehe xa.

⁴⁸ Cottimeja Natanael joanchiangui co ndačo:

—¿Quexén chonxinxin na?

Co Jesús ndačo:

—Janha vicon jaha are jaha tarrihi ngangui ntahigo icha saho que Felipe rrogayaha.

⁴⁹ Cottimeja Natanael ndačo:

—Maestro, jaha tti Xenhe Dios; jaha tti Rey de Israel.

⁵⁰ Jesús ndačo:

—¿Avitticaon na jehó ixin ndattjo vicon jaha tar-ringahngui nttahigo? Jaha sicon cosa icha jian que jihi.

⁵¹ Cai ndačo Jesús:

—Rrindattjo ra ndoa que jaha ra sicon ra ngajni jiřangué co ángel de Dios tsajinhi co rroxincanji ngataha na janha, tti Xí que joixin de ngajni.

2

Are cottehe yó chojni ngain Caná de Galilea

¹ Ní nchanho después vehe ná quiai para yó chojni que cottehe ngain rajna Caná ngain regioen Galilea. Janné Jesús nttiha vehe jan, ² co ndache na Jesús ixin jehe cjoí ngain quiai mé, jehe conixin chojní que vacao. ³ Co are jehe na te nttiha, ndajoexin vino, mexinxin janné Jesús ndačo jan ngain:

—Ichondaha na vino.

⁴ Pero Jesús ndačo:

—Soixin, ¿quedonda ndachjenji na janha yá? Tiempo řa ttiha para janha tsjenguijna chojni.

⁵ Pero jehe janné Jesús ndačo jan ngain chojni que tedanjo jehe vino mé:

—Nchehe ra cain tti jehe rrondattjo ra.

⁶ Nttiha vintte incjaon nchířa de řo, tti vanchegonda chojni judío para vaconttixin na jinda rá na tsje nttiha inchin costumbré jehe na. Co cada nchířa mé vaguiquia inchin ochenta o cien litro de jinda. ⁷ Jesús ndačo ngain chojni que tettequia vino:

—Ncheče ra cain nchířa tehe de jinda.

Co jehe na hasta joinchečetaonca na cain nchířa mé, ⁸ cottimeja Jesús ndačo ngain na:

—Janché, dantsje ra nchin nda co ttjiohe ra niencargado.

Co jamé joinchehe na. ⁹ Co jinda mé ondadicjan nda vino co jehe noeha ttinó joixin vino mé, jehó cain chojni que cointtjecjan vino mé vinttenohe na ixin jehe na joantsje na jehó jinda. Co tti encargadó vayé xinovio ¹⁰ co ndačo ngain xa:

—Cainxin chojni saho danjo na tti vino icha jian, co are cain chojni que dihi, atto ovihi na, cottimeja dihi na tti vino corriente. ¡Pero jaha diquenchjinha tti vino icha jian hasta jaxon!

¹¹ Jihi tti joinchehe Jesús ngain Caná de Galilea co jihi tti saho milagro que jehe joinchehe co milagro mé xagoxin ixin jehe Jesús chonda anto tsje joachaxin. Co cain chojni que vacao Jesús vitticaon na ngain jehe.

¹² Después de jihi, jehe Jesús co janné, co xanchó conixin cain chojni que vacao jehe Jesús sacjoi na para ngain rajna Capernaum, co nttiha vintte na canxion nchanho.

*Jesús joincheroa nihngo icha importante
(Mt. 21.12-13; Mr. 11.15-18; Lc. 19.45-46)*

¹³ Ixin ojoiconchian tti quiai dinhi pascua para ixin cain chojni judío, Jesús sacjoi para ngain ciudad de Jerusalén. ¹⁴ Nttiha ngain patioe nihngo icha importante vittja Jesús chojni que tenchecji coxinttá, coleco, co conttoa, co chojni que tate ngain puestoe tti dasinguixinxin na tomi para chojni vachonda na suelto. ¹⁵ Are Jesús vicon jihi, joinchechjian ná cuarta de jino, co joantsjexin cain chojni mé de nttiha, jehe na conixin colecoe na, co coxinttehe na. Co tti chojni que tedasinguixin tomi, joanqué tomí na ngataha nontte co

cjoa mesa ndaha. ¹⁶ Co Jesús nichja ngain cain chojni que tenchecji conttoa co ndačo:

—¡Dantsjexin ra cain jihi de nttihi! ¡Nchechjianha ra ngain nchiandoha Ndodana ná ndásin!

¹⁷ Cottimeja tti chojni que vacao Jesús xaxaon na ixin ndačo ngain tti jitaxin Palabré Dios: “Janha anto toñaonxin nchiandoi.”

¹⁸ Cottimeja chojni judío que vinttechonda joachaxin joanchiangui na ngain Jesús co ndačo na:

—¿Quehe señal tsjagohna ni ra para que janha na rrochonxin na seguro que jaha chonda joachaxín Dios para nchehe jihi?

¹⁹ Jesús ndačo:

—Tonxantte ra nihngo icha importante jihi, co nincoa nchanho janha sinttachjian nihngo iná.

²⁰ Cottimeja chojni mé ndačo na:

—Cuarenta y seis nano conchjenhe chojni para joinchechjianxin na nihngo icha importante jihi. ¿Co apoco jaha nchao sinchechjian nihngo nincoa nchanho?

²¹ Pero tti nihngo que Jesús nichja, nichja de ixin mero cuerpoe jehe. ²² Mexinxin are Jesús xechon de tti jehe ndavenhe, cain chojni que vacao jehe xaxaon na de ixin jihi tti jehe ndačo, co vitticaon na tti ndačo ngain tti jitaxin Palabré Dios, co cai vitticaon na tti ndačo Jesús ngain na.

Jesús chonxin quehe xaxaon cain chojni

²³ Are Jesús vehe ngain Jerusalén ngain quiai que dinhi pascua, atto tsje chojni vitticaon na jehe are vicon na tsje milagro que jehe joinchehe.

²⁴ Pero Jesús vechondaha confianza ngain na ixin jehe ovechonxin ngain ansén cain na. ²⁵ Jehe

gondeha ni ná chojni que rrondache de ixin icha chojni ixin jehe mismo venohe quehe xaxaon cain chojni.

3

Are Jesús nichja ngain Nicodemo

¹ Vehe ná xifariseo vinhi Nicodemo, mé cjoí ná xí importante ngayé chojni judío. ² Nicodemo jihi ná ttie cjoí para joitsjehe Jesús co ndačo:

—Maestro, nona na que Dios rroanha jaha para sinchecoanna ni ra, ixin xonhi chojni nchao sinchehe tsje cosa inchin jaha rrinchehe si Dios coha ngain chojni mé.

³ Cottimeja ndačo Jesús:

—Janha rrindattjo ndoa, que xonhi chojni nchao rrochonda parte ngain tti ttetonha Dios si jehe tsoncjiha iná.

⁴ Nicodemo ndačo:

—Pero ¿quexén ná xí ojje rrocjan tsoncjihi iná? ¿Apoco nchao rrocjan xa ngaxinhi tsehe janné xa para rrocjan xa tsoncjihi xa iná?

⁵ Co Jesús ndačo:

—Janha rrindattjo ndoa, que tti chojni que tsoncjinha de ixin jinda co de ixin Espíritu Santo čhoha sehe ngain parte tti ttetonha Dios. ⁶ Tti toncjin de ngain chojni, jehe jichjon jecho de ngain cuerpoe, co tti otoncjihi de ixin Espíritu Santo, jehe ojichjon de ngain espiritue. ⁷ Xaonha que rrindattjo: “Cainxin chojni chonda na que tsoncjihi na iná.” ⁸ Čhintto danotte ttinó jehe rinao, co jaha ttinhi ruido que nchechjian čhintto, pero noaha de ttinó ttixin čhintto co ni ttinó sattji

chintto. Jañá cai chojni choha ttinxin na quexén chojni toncjihí de ixin Espíritu Santo.

⁹ Cottimeja, Nicodemo cjan joanchiangui iná:

—¿Quexén nchao tsonhe jihí?

¹⁰ Jesús ndačho:

—Jaha, que ná jian maestroe ley de Dios para chojni Israel, ¿aşa noaha cain cosa jihí? ¹¹ Janha rrindattjo ndoa, que janha na nichja na de lo que tti nona na co janha na nichja na de lo que tti vicon na, pero jaha ra ditticaonha ra tti ndattjo ra janha na. ¹² Si ditticaonnaha ni ra are rrinichjaha ra de ixin cosa ngataha nontte jihí, ¿quexén sitticaon ra si rronichjaha ra de ixin cosa que jí ngajni?

¹³ Xonhi chojni coajinhi para ngajni, sino janha, tti Xí que joixin de ngajni, co janha rrihi nttiha. ¹⁴ Co jañá inchin Moisés joinchechjian ná conché de chia co coenganito conché mé nttá ngagaha jna, cai janha, tti Xí que joixin de ngajni, chonda que saringanito ná nttá ¹⁵ para que cainxin chojni que ditticaon nganji na janha, chojni mé tsjiha na ngain infierno, sino que rrochonda na iná vida naroaxin que xonhi tiempo tsjexin.

Quexén Dios rinao cainxin chojni

¹⁶ 'Dios anto rinao cainxin chojni ngataha nontte, mexinxin joanjo tti nacoaxinxon Xenhe para que cainxin chojni que ditticaon ngain jehe Xan tsjiha na ngain infierno, sino que rrochonda na iná vida naroaxin que xonhi tiempo tsjexin. ¹⁷ Dios jeha rroanha Xenhe ngataha nontte para sinchecastigá Xan chojni; Dios rroanha Xenhe

para tsjenguijna Xan cain chojni para rrochondaha na castigo de cainxin cosa jianha que nchehe na.

¹⁸ Tti chojni que ditticaon ngain Xenhe Dios, chojni mé rrochondaha na castigo, pero tti chojni que ditticaonha, mé Dios ondačo ixin sinchecastigá na ixin ditticaonha na tti nacoaxinxon Xenhe Dios. ¹⁹ Dios sinchecastigá tti chojni que ditticaonha Jesucristo ixin are Jesucristo joí ngataha nontte, jehe joí inchin joadingasán, co jehe na icha joincheřoxinhi na tti naxin xehe ixin vanchehe na cosa jianha. ²⁰ Cain chojni que nchehe jianha ningaonhe na joadingasán co tonchienha na ngain tti jí joadingasán para que tsononxinha tti jianha que tenchehe na. ²¹ Pero chojni que tenchehe jian, chojni mé tonchienhe na ngain tti jí joadingasán para que sicon icha chojni que jehe na tenchehe na inchin rinao Dios.

Juan, tti vanheguitte chojni, cjan nichja de ixin Jesús

²² Después de cain jiji, Jesús cjoí conixin tti chojni que vacao para ngain nonttehe Judea, co vintte na canxion tiempo nttiha. Co joinheguitte na chojni nttiha. ²³ Cai tiempo mé, Juan joinheguitte chojni ngain ná rajna que dinhi Enón, chian ngain rajna Salim ixin nttiha vehe atto yé jinda co chojni vaquí na co vajiguitte na. ²⁴ Jiji conhe icha saho que are Juan coiaxinhi na ngain cárcel.

²⁵ Cottimeja canxion chojni que vacao Juan joinchediscutí na ngain canxion chojni judío de ixin queřen icha jian ncheguitte na chojni

para toroaxin na de tti jianha que nchehe na.
²⁶ Mexinxin cjoï na co joindache na Juan:

—Maestro, ¿aħaxaon tti vehe nganji are jaha joarihi lado ĉhinxin nchanho de río Jordán, tti jaha ndachjenji ni ra? Jai jehe mé jincheguitte chojni co cainxin na teditticaon na jehe.

²⁷ Cottimeja Juan ndaĉho:

—Ni ná chojni ĉhoha rrochonda joachaxin si Dios rrochjeha. ²⁸ Jaha ra mismo coinna ra are ndaĉhjan claro que janha jeha tti Cristo que Dios rroanha, pero janha tti chojni que joihi icha saho de jehe. ²⁹ Are chojni tottehe na, tti chonda xanovia, mé tti novio, co tti amigoe xinovio jí nttiha co atto ché are ttinhi nichja xinovio. Jańá janha jai cai anto chahna are chojni cjoï na ngain Jesús. ³⁰ Jehe chonda que icha co icha importante sehe, co janha chonda que sarihi icha co icha menos importante.

Juan nichja de ixin tti ttixin de ngajni

³¹ Juan ndaĉho cai:

—Tti ttixin de ngajni chonda icha tsje joachaxin de cainxin. Co tti ttixin de ngataha nontte jehe de ngataha nontte, co nichja de ixin cosa de ngataha nontte. Pero tti ttixin de ngajni, jehe chonda joachaxin ngain cainxin cosa, ³² co nichja de ixin tti jehe vicon co tti jehe coinhi, pero xonhi chojni ditticaon tti jehe ndaĉho. ³³ Pero si ĉhoan ni ditticaon, jańá xago ixin jehe ditticaon que Dios ndaĉho tti ndoa. ³⁴ Jehe tti Dios rroanha nichja palabré Dios, ixin Dios danjo Espíritu Santo ngain jehe hasta tti iĉhoha. ³⁵ Ndodé rinao Ndo jehe, co

chjé Ndo cainxin joachaxin. ³⁶ Chojni que ditti-caon Xenhe Ndo chonda na iná vida naroaxin que xonhi tiempo tsjexin. Pero tti rinaoha ditticaon Xenhe Ndo, rrochondaha vida mé, co sayé tti anto soji castigoe Dios.

4

Tti nda'cho Jesús ngain ná n'chí de Samaria

¹ Cottimeja xifariseo coinhi na que Jesús ve-chonda icha tsje chojni que vaguitticaon co icha tsje chojni vancheguitte que Juan. ² Pero jeha Jesús tti vancheguitte chojni; jeha tti chojni que vacao Jesús tti vancheguitte na. ³ Co are Jesús conohe jihi, jeha va'chjexin de Judea para sacjan ngain Galilea.

⁴ Co ngain viajé chonda que vatto ngain regioen Samaria. ⁵ Co nttiha joihi ngain ná rajna que vinhi Sicar, chian ngain nontte que Jacob joanjo ngain xenhe, xan vinhi José, anto tsje nano icha saho. ⁶ Co nttiha vehe tti pozo que vancheguinhi na pozoe Jacob. Jesús ocon'chjen jói, mexinxin tave-tanda ngandehe pozo nttiha. Co hora mé inchin ngosine nchanho. ⁷⁻⁸ Co cain chojni que vacao Jesús savinttecji na ngain rajna para joiquehna na cosa que sine na. Co hora mé ná n'chí de Samaria jói n'cha ngain pozo mé para joica n'cha jinda, co Jesús nda'cho ngain n'cha:

—Chjana nchin jinda sihi.

⁹ Cottimeja jeha tti n'chí samaritana mé nda'cho n'cha ngain Jesús:

—Jaha ná chojni judío, ¿quedonda danchiana jinda janha, que janha samaritana na?

(Jehe n̄cha ndācho n̄cha jamé ixin chojni judío čoha na nichjé na chojni samaritano.)

¹⁰ Cottimeja Jesús ndācho:

—Si rroconoha jaha tti danjo Dios co quensen tti jidanchiaha jinda, seguro que jaha rroganchiana jinda janha, co janha rrochjaha jaha jinda que danjo vida.

¹¹ Tti n̄chí mé ndācho:

—Soixin, ni chondaha tti santsjexin jinda co pozo atto nihnga. ¿De ttinó rrochjananxin jinda que danjo vida? ¹² Ndogoelitona na x̄ančhjen que vinhi Jacob cointtoena na pozo jihi, tti jehe ndo mismo vaguihi ndo jinda nttihi, co nttihi vaguihi cain xenhe ndo jinda co cain coxigoe ndo. ¿Apoco jaha icha que jehe ndo?

¹³ Jesús ndācho:

—Cain chojni que dihi jinda jihi rrocjan rrondācho sihi na jinda iná; ¹⁴ pero tti chojni que sihi tti jinda que janha danjo, ixonhi tiempo rrocjan rrondācho sihi na jinda mé iná, ixin tti jinda que janha danjo rročhinhi jinda mé inchin ná manantial ngaxinhi cuerpoe chojni que sihi nda para sanjo nda iná vida naroaxin que x̄onhi tiempo tsjexin ngain chojni que dihi jinda mé.

¹⁵ Cottimeja ndācho jehe tti n̄chí mé:

—Soixin, chjana jinda yá janha, para que janha irrocjanha rrondācho sihi jinda iná, ni irrochon-daha que sihi nttihi ngain pozo jihi para sigantsje jinda.

¹⁶ Jesús ndācho:

—Ttji digayehe xixiha, cottimeja sihi nttihi iná.

¹⁷ Jehe tti n̄chí ndācho:

—Janha chondaha xixihna.

Cottimeja ndačo Jesús:

—Jaha chonda razón ixin ndačo que chondaha xixiha ¹⁸ ixin jaha ojoaricoho naho xí, co tti naho xí mé cjoí mero xixiha, pero tti xí que chonda jai jaha xixiha. Mexinxin jaha ndačo tti ndoa de ixin jiji.

¹⁹ Tti nčí mé are coinhi jiji ndačo:

—Soixin, janha ttianxin que soixin ná profeté Dios. ²⁰ Nigoelitona na žančhjen samaritano joinchesayehe na Dios ngataha jna jiha, pero jaha ra žo chojni judío ndačo ra que ngain Jerusalén, nttiha tti jiquininxin sinttasayaxin na Dios.

²¹ Jesús ndačo:

—Ditticaon tti rrindattjo, que tsí nchanho que jaha ra sinchesayehe ra Ndo dá na pero irrochondaha ra que tsji ra ngain jna yá ni ngain Jerusalén.

²² Jaha ra žo samaritano ra noaha ra de ixin quensen nchesayehe ra, pero janha na nona na de ixin quensen nttasayá na ixin tti chojni que tsjenguijna icha chojni para rrochondaha na castigo de cain cosa jianha que nchehe na, jehe chojni mé joixin de ngain chojni judío. ²³ Pero tsí nchanho para que tti chojni que ndoa nchesayehe na Ndo dá na pero sinchehe na conixin ansén na jian co inchin jehe Ndo rinao Ndo, co jai ojoí nchanho mé. Ixin Ndo dá na rinao Ndo que jaňá sinchehe tti chojni que nchesayehe Ndo. ²⁴ Dios jehe espíritu, co tti chojni que nchesayehe Ndo chonda na que sinchehe na conixin ansén na jian co inchin jehe Ndo rinao Ndo.

²⁵ Tti nčí mé ndačo:

—Janha nona que tsí tti Cristo que Dios rroanha, co are jehe tsí, jehe rrondachjenji na cainxin.

²⁶ Jesús ndačo:

—Janha tti Cristo na, tti jinichja nganji jaha.

²⁷ Co rato mé vinttequí tti chojni que vacao Jesús, co jehe na vinttegoan na admirado ixin Jesús tajitjao ná nčí. Pero ni ná na joinaoha na joanchianguihi na Jesús ixin quehe rinao nčí mé o de quehe jitjao Jesús nča. ²⁸ Cottimeja tti nčí mé nttiha cointtohe nchižehe co sacjoi para ngagaha rajna para joindache chojni:

²⁹ —Āacoi ra sitsjehe ra ná xí que ndachjenji na janha cainxin tti janha jointtaha. ¿Ajeha jehe xí jihi tti Cristo que Dios rroanha?

³⁰ Cottimeja tsje chojni vinttegačhjexin na de rajna mé para vinttecji na tti jí Jesús. ³¹ Co are nčí mé jindache nča chojni ngain rajné nča, chojni que vacao Jesús joinchetsenhe na ñao jehe Jesús co ndačo na:

—Maestro, jintte.

³² Pero Jesús ndačo:

—Janha chonda tti jine que jaha ra chonxinha ra.

³³ Co tti chojni que vacao Jesús coexinhi na joanchianguihi chó na jeho na co ndačo na:

—¿Ani čhoan chojni joiaöhe tti joine?

³⁴ Pero Jesús ndačo:

—Are janha nttaha inchin rinao jehe tti rroanha na, co tsjena xé jehe, jihi inchin tti jine janha.

³⁵ Jaha ra ndačo ra: “xa ditján nó conittjao para cosecha”, pero janha ndattjo ra: tsjehe ra; tsje chojni ttí nganji na. Co cain nimé inchin trigo que odicha co onchao jí para tsjejo ni. ³⁶ Tti nchehe xa que ttjejo chojni mé, jehe inchin ninchehe xana ngain cosechana que datse chojni para rrochonda

na iná vida naroaxin que xonhi tiempo tsjexin. Mexinxin tti ttenga co tti tsín cosecha ché na nataonxin. ³⁷ Ixin ndoa tti ndačo dicho: “Jé tti ttenga co jé tti tsín cosecha.” ³⁸ Janha rroanha jaha ra para joitsinhi ra cosecha tti xonhi xa joinchehe ra jaha ra. Jañá jé ni joinchehe xa, co jaha ra tsjejo ra cosecha.

³⁹ Tsje chojni ngain jehe rajna mé de ngain Samaria vitticaon na Jesús, jehó ixin tti ndačo tti nchí jiha are ndačo ncha: “Jehe ndachjenji na cainxin tti jointtaha janha.” ⁴⁰ Mexinxin are jói tsje chojni samaritano, jehe na joinchetsenhe na ñao Jesús ixin tarroguehe ngain na. Co Jesús vittohe ngain na nttiha yó nchanho, ⁴¹ co icha tsje na vitticaon na are coinhi na tti ndačo Jesús. ⁴² Cottimeja jehe na ndache na jehe tti nchí mé:

—Jai ditticanho na, co jeoha ixin tti jaha ndachjenji ni ra, cai ixin janha na mismo coian na tti nichja jehe, co nona na que ndoa jehe tti Cristo que Dios rroanha para que tsjenguijna cain chojni ngoixin mundo para rrochondaha na castigo de cain cosa jianha que nchehe na.

Jesús joinchexingamehe ná xenhe ná xiemplea-doe gobierno

⁴³ Yó nchanho vatto, cottimeja Jesús vačhjexin de jehe rajna ngain regioen Samaria co joinchehe sigue viajé para ngain nonttehe Galilea. ⁴⁴ Co ndačo Jesús: “Chojni nchesayeha na ná profeté Dios que joixin de ngain xajeho rajné na.” ⁴⁵ Are joihi Jesús ngain Galilea, chojni nttiha vayé na Jesús jian ixin cai dinttecji na tti quiai dinhi pascua

ngain Jerusalén co nttiha vintteguicon na cain tti joinchehe Jesús ngain quiai mé.

⁴⁶ Cottimeja Jesús cjan para ngain rajna Caná ngain Galilea, tti cjoncjamangaxin Jesús jinda vino. Co nttiha vehe ná xí vechonda jie joachaxin ngain gobiernoe rey. Co xí mé vechonda xa ná xenhe xa que venihi ngain rajna Capernaum.

⁴⁷ Co are xí mé conohe xa que Jesús ojoixin de Judea co joí ngain Galilea, xí mé cjoí xa, joitsjehe xa, co joinchetsenhe xa ñao Jesús ixin tsji ngain nchiandoha xa para sinhexingamehe xenhe xa de chin que chonda xa ixin ovehe de ndarroguenhe xan. ⁴⁸ Cottimeja Jesús ndačo ngain xí mé:

—Jaha ra ditticaonha ra si diconha ra canxion señal co milagro.

⁴⁹ Pero tti xí mé ndačo:

—Soixin, daca xacoi, ante que ndasenhe xanhna.

⁵⁰ Cottimeja ndačo Jesús:

—Sacjan ngain nchiandoi; xanha oxingamehe xan.

Tti xí mé vitticaon tti ndačo Jesús, co sacjoi xa.

⁵¹ Co are ochian jidiji xa nchiandoha xa, vačhje ninchehe xé xa para joichoexin na xa ngatja nttiha, co ndačo na ngain xa:

—Xanha oxingamehe xan.

⁵² Cottimeja jehe xa joanchiangui xa ngain na ixin quehe hora coexinhi xingamehe xenhe xa de ixin tti chin que veyá xan, co jehe na ndačo na:

—Jna, ná hora después de ngosine nchanho ndavačhjehe xan soa.

⁵³ Cottimeja jehe xa xaxaon xa que hora mé ndačo Jesús ngain xa: “Xanha oxingamehe xan”; co jehe xa conixin cain nindoha xa vitticaon na Jesús.

⁵⁴ Jihi tti yoxin milagro que joinchehe Jesús are jehe cjanxin de ngain Judea para joí ngain Galilea.

5

Jesús joinchexingamehe ná xí que čhoha vacji ngain rajna Betesda

¹ Después de jihi, chojni judío joinchechjian na ná quiai; co Jesús cjan ngain ciudad de Jerusalén.

² Ngain ciudad mé, chian ngain tti puerta que dinhi “Puerté Coleco” nntiha jí ná ttoe que jiria jinda que ngain nguigoa hebreo dinhi ttoe mé Betesda. Co ngain ttoe mé jí naho portal. ³ Nntiha tetsinga tsje chojni nihi ngataha nontte. Nntiha te chojni tti čhoha dicon, co tti čhoha ttji, co tti čhoha ttingui; co cain chojni mé techonhe na nntiha hasta que jinda mé tsinguittjen nda. ⁴ Ixin te rato que nntiha vaxincanji ná ángel ngain ttoe mé co vanchenguittjen jinda, co tti nihi que saho vajingui jinda mé, jehe ndavaxingamehe de quexeho chin que jehe vechonda. ⁵ Co nntiha vehe ná xí que ovechonda treinta y ocho nano de venihi xa. ⁶ Are Jesús vicon que xí mé tajitsinga xa nntiha, jehe ovenohe ixin anto sé venihi xa. Mexinxin ndačo ngain xa:

—¿Arinao rroxingamaha?

⁷ Co jehe tti nihi mé ndačo:

—Soixin, janha chondaha quensen rroxangui na jinda are tsinguittjen nda. Cada nntiha que

janha rinaho sihngui nda, ojé ni dingui nda icha saho.

⁸ Jesús ndačo:

—Dingattjen, co tsinhi caniaha co sattjixin de nttihi.

⁹ Co rato mé jehe xí mé ndaxingamehe xa co tsín xa caniehe xa co coexinhi xa sacjoixin rotté xa. Pero ixin nchanho mé, mero nchanho para vanchejogaha na, ¹⁰ chojni judío que vinttechonda joachaxin ndačo na ngain jehe tti xí que xingamehe:

—Jai nchanho que ncheha ni řa, mexinxin jianha para que jaha tsame caniaha.

¹¹ Tti xí mé ndačo:

—Tti joinchexingamana ndachjenji na: “Tsinhi caniaha co sattji.”

¹² Cottimeja joanchiangui jehe na co ndačo na:

—¿Quexehe tti ndattjo: “Tsinhi caniaha co sattji”?

¹³ Pero tti xí mé venoeha quensen joinchexingamehe ixin Jesús sacjoi ngayehe tti anto tsje chojni que te nttiha. ¹⁴ Después Jesús vetanxin tti xí mé ngain nihngo icha importante, co ndačo Jesús ngain xa:

—Tsjenxin, jai jaha oxingamaha, mexinxin cjanha nchehe cosa jianha para que rrocjanha tsonha icha tangui.

¹⁵ Cottimeja tti xí mé sacjoi co joindačo ngain chojni judío que vinttechonda joachaxin ixin Jesús tti joinchexingamehe jehe. ¹⁶ Mexinxin chojni mé joiningaconhe na Jesús co joinao na narrogoenxon na are maho ixin vanchehe Jesús jańá

ngain nchanho que jiquininxinha nchehe ni ãa.
¹⁷ Pero Jesús ndaço ngain na:

—Ndodana cainxin tiempo jinchehe Ndo ãa, co janha cai rrinttaha ãajeho ãa mé.

¹⁸ Mexinxin chojni mé icha joinao na narrogoenxon na Jesús, jeoha ixin vancheha Jesús caso ley tti nchanho que jiquininxinha nchehe ni ãa, cai joinao na narrogoenxon na Jesús ixin jehe vandaço ixin jehe inchin Dios are jehe ndaço ixin Dios tti Ndodé jehe.

Tti joachaxin que chonda Xenhe Dios

¹⁹ Cottimeja Jesús ndaço ngain na:

—Ndoa tti rrindattjo ra que janha, tti Xenhe Dios, çoha sinttaha ni nã cosa inchin janho sinaho, jeho nttaha tti dicon nchehe Ndodana. Cainxin tti nchehe Ndodana, cai janha, tti Xenhe Ndo, sinttaha. ²⁰ Ndodana rinao na Ndo co tjagohna Ndo cain tti jehe Ndo nchehe Ndo; co tsjago Ndo nganji na cosa que chonda icha joachaxin que hasta jaha ra soan ra admirado. ²¹ Co jañá inchin Ndodana nchexingamehe Ndo chojni que ondavenhe co chjé Ndo vida, cai janha, tti Xenhe Ndo, danjo vida ngain chojni que rinaho sayé vida mé. ²² Co Ndodana ãonhi chojni nchejuzguehe Ndo, ixin chjana Ndo janha, tti Xenhe Ndo, cainxin joachaxin para que janha sinttajuzgá cain chojni, ²³ para que cainxin chojni sinchesayana na janha, tti Xenhe Ndo, inchin nchesayehe na jehe Ndo. Tti chojni que nchesayanaha janha, tti Xenhe Ndo, cai nchesayehe na jehe Ndodana que rroanha na janha.

²⁴ 'Janha rrindattjo ra ndoa: Tti chojni que nchehe caso tti janha rrindačhjan, co ditticaon chojni mé ngain jehe tti rroanha na janha, chojni mé chonda na iná vida naroaxin que xonhi tiempo tsjexin, co jehe na rrochondaha na castigo ixin ovattohe na tti ndadenhe ni co te na ngain tti techon ni. ²⁵ Janha rrindattjo ra ndoa que tsí nchanho are chojni que inchin ondavenhe tsinhi na ttana janha, tti Xenhe Dios, co chojni que sitticaon tti ndačhjan rrochonda na iná vida naroaxin, co jehe nchanho mé ojoí nchaon jai. ²⁶ Nnodana chonda Ndo joachaxin para danjo Ndo iná vida naroaxin jehe Ndo mismo, co cai chjana Ndo joachaxin mé janha, tti Xenhe Ndo, para que janha cai sanjo vida mé. ²⁷ Co chjana Ndo joachaxin para que janha sinttajuzgá chojni ixin janha tti Xí que joixin de ngajni. ²⁸ Jaha ra doanha ra admirado de ixin jiji ixin tsí nchanho que cain chojni que ondavenhe tsinhi na ttana, ²⁹ co sačhjenguixin na de tti teřavá na. Co tti nijoinchehe jian rroxechon na para rrochonda na iná vida naroaxin, pero tti nijoinchehe jianha rroxechon na para rrochonda na castigo.

Quexén chojni nchao rrochonxin ixin Jesús tti Xenhe Dios

³⁰ 'Janha čhoha sinttaha ni ná cosa inchin janho rinaho. Janha nttaha juzgado inchin ttetonna Nnodana co cain tti nttaha, mé jian ixin řaxaonha sinttaha inchin janha rinaho, sino que janha nttaha joxon inchin rinao Nnodana que rroanha na. ³¹ Si janho rrondačhjan ixin janha anto jian na, palabra mé xonhi řé si coha icha chojni tti

rondačo jian de ixin janha. ³² Pero Ndodana cai nohe Ndo jian tti janha nttaha, co janha nona que tti ndačo Ndo de ixin janha, ján rentte. ³³ Co jaha ra rroanha ra chojni para joanchianguihi na Juan co ndoa tti jehe ndattjo ra de ixin janha. ³⁴ Pero janha gondanaha para que chojni rronichja jian de ixin janha; janha jeho ndačhjan jihi para que jaha ra nchao sitticaon ra tti ndačhjan para rrochonda ra iná vida naroaxin. ³⁵ Juan, jehe vehe inchin ná lámpara que vanchengasán. Co jaha ra joinao ra co chaha ra de ixin jehe joadingasán mé, pero seha. ³⁶ Juan vanichja jian de ixin janha, pero jai cain tti rinao Ndodana, mé tti janha rrinttaha ngayaha ra co mé tti tjagoha ra icha jian ixin ndoa que Ndodana tti rroanha na. ³⁷ Cai Ndodana que rroanha na janha, jehe Ndo ndačo Ndo que cain tti ndačhjan ndoa. Pero jaha ra xonhi tiempo coinhi ra tté Ndo ni diconha ra Ndo. ³⁸ Co joajné Ndo joixinha ngain ansean ra ixin ditticaonha ra nganji na, tti jehe Ndo mismo rroanha Ndo. ³⁹ Jaha ra tetangui ra tti libro que jitaxin Palabré Ndo conixin anto tsje ciudadano, ixin rinao ra sinchí ra nttiha que xén rrochonda ra iná vida naroaxin que xonhi tiempo tsjexin, co jehe libro mé tti nichja de ixin janha. ⁴⁰ Pero jaha ra rinaoha ra ditticaon ra nganji na para que sayehe ra vida mé.

⁴¹ 'Janha rinaoha que chojni sinchesayana. ⁴² Janha chonxin jaha ra co nona que jaha ra rinaoha ra Dios. ⁴³ Janha joihi ixin Ndodana rroanha na co jaha ra rinaoha ni ra, pero si jecoa iná chojni rroquí para rrojindattjo ra tti jeho xaxaon, chojni mé, nchoe, rrojinao ra. ⁴⁴ Jaha

ra čhoha ditticaon ra nganji na ixin jaha ra joho rinao ra icha chojni sinttasayaha ra co rinaoha ra sinttasayaha ra tti nacoaxinxon Dios. ⁴⁵ Jaha ra řaxaonha ra ixin janha tsjanguiha ra ngat-toxon con Ndadana. Janha nahi, ixin ley que vayé Moisés, mé tti tsjanguiha ra masqui jaha ra řaxaon ra ixin ley mé sinttaroa ra ngattoxon con Dios. ⁴⁶ Ixin si jaha ra rroguitticaon ra tti ndačo Moisés, cai rroguitticaon ni ra janha ixin Moisés dicjin de ixin janha. ⁴⁷ Pero jaha ra ditticaonha ra tti jehe dicjin, mexinxin ¿queřen sitticaon ra tti janha rrindattjo ra?

6

*Are Jesús joanjo tti joine naho mil xí
(Mt. 14.13-21; Mr. 6.30-44; Lc. 9.10-17)*

¹ Después de cain jahi, Jesús sacjoi para toenxin lago de Galilea, que řajeho lago mé tti dinhi Tiberias. ² Anto tsje chojni varroé Jesús ixin vaguicon na que Jesús vanchehe tsje milagro are vaguicon na que Jesús vanchexingamehe chojni nihi. ³ Cottimeja Jesús co cain tti chojni que vacao coani na ná jna co tavintte na nttiha nchion. ⁴ Co jamé conhe chian ngain tiempoe tti quiai dinhi pascua. ⁵ Co are Jesús vicon ixin anto tsje chojni terroé, Jesús ndačo ngain Felipe:

—¿Quettinó siquehna na tti sine cainxin chojni jahi?

⁶ Pero jehe ndačo jańá para viconxin quehe rrondačo Felipe ixin Jesús ovenohe jian quehe sinchehe. ⁷ Cottimeja Felipe ndačo:

—Cain tomi que dacha ná tti nchehe ꝥa yáto conittjao ꝥa sittjaha tomi mé para sinanxin cain niottja que sine cain chojni yá.

⁸ Cottimeja Andrés, xanchó Simón Pedro co cai jehe ná de tti chojni que vacao Jesús; jehe Andrés ndačo ngain Jesús:

⁹ —Nttihi jí ná xanxichjan que chonda naho niottja de cebada co yó copescado, pero ¿quexén sittjaxin jihi para cainxin chojni yá?

¹⁰ Cottimeja ndačo Jesús:

—Ndache ra cainxin na que tasintte na ngataha nontte.

Anto cachji vehe ngain lugar mé, co tavintte cain nimé. Co jehó xí vintte naho mil xa.

¹¹ Cottimeja Jesús coá tti naho niottja mé ngain rá, co joanjo gracias ngain Dios. Cottimeja Jesús joanjo niottja mé ngain tti chojni que vacao, co jehe chojni mé conchjea na niottja mé ngain chojni que tate nttiha. Co cai jamé joinchehe Jesús ngain copescado co chojni que vacao Jesús conchjea na ngain chojni cain tti joinao na. ¹² Co are ojoexin joine na co ndacojehe na, Jesús ndačo ngain chojni que vacao:

—Datse ra cain pedazo de niottja que xehe para que xonhi sitján.

¹³ Jehe na joatse na nio rioho mé, co joinchecaon na tteyó nntaxa de ixin tti pedazo que xexin joine na de tti naho niottja de cebada. ¹⁴ Cottimeja cain chojni mé are vicon na tti milagro jihi que Jesús joinchehe ndačo na:

—Ndoa jehe jihi tti profeté Dios que chonda que tsí ngataha nontte.

¹⁵ Pero Jesús conohe ixin cain chojni mé joinao na sarrojicaon na Jesús masqui jehe roçhoaha para que jehe na rrojincheguinhi na Jesús rey de jehe na. Mexinxin sacjoi Jesús hasta tti con jna para que nchao tavehe jecho.

Jesús cjoixin rotté ngataonhe jinda
(Mt. 14.22-27; Mr. 6.45-52)

¹⁶ Co are ondaconttie cain tti chojni que vacao Jesús xincanji na para ngain lago, ¹⁷ co joixinhi na ngain ná barco co coexinhi na coattoa na lago mé para joihi na ngain Capernaum. Co rato mé ondaconaxin xehe co Jesús ða cjanha. ¹⁸ Cottimeja coexinhi cjoa ná çhintto soji, co jinda anto soji cjamanguitaon chó nda. ¹⁹ Co are osacjoi na inchin naho o incjaon kilómetro de ngandehe nda, jehe na vicon na que Jesús jitonchienne ngain barco mé; conixin rotté jittjixin ngataonhe nda, co cain jehe na vintteðaxon na. ²⁰ Pero jehe ndaço ngain na:

—¡Janha joihi, ðaonha ra!

²¹ Cottimeja jehe na iðaxonha na co chonhe na Jesús para que jehe coani barco cai. Co rato mé ojoihi na ngain tti nontte que jehe na tettji na.

Are chojni cjoé na Jesús

²² Ndoexin tti chojni que ndavittohe toenxin ndachaon tti sacjoixin Jesús conixin tti chojni que vacao, vintteguicon na que cain chojni que vacao Jesús savicaon na jecho tti nacoa barco que vehe nttiha, co vintteguicon na que Jesús cjoiha ngain chojni mé. ²³ Pero de cain yá, icanxin barco joixin de ngain ciudad de Tiberias co cjoia chiaon ngain lugar tti joinenxin na niottja después que Jesús joanjo gracias. ²⁴ Mexinxin are vintteguicon cain

chojni mé ixin iveha Jesús nttiha ni cain chojni que vacao jehe icoha na nttiha, cain chojni mé vixinhi na barco mé co sacjoi na para rajna Capernaum para joicjé na Jesús.

Jesús tti niottja que danjo vida que xonhi tiempo tsjexin

²⁵ Are cain chojni mé vintteguiji na toenxin lago mé, nttiha viconxin na Jesús iná co joanchianguihi na co ndačo na:

—Maestro, ¿quesa joihi nttihi?

²⁶ Pero Jesús ndačo ngain na:

—Janha rrindattjo ra ndoa que jaha ra ttjé ni ra ixin jointte ra hasta cojaha ra co jeha ixin jaha ra coinxin ra quehe rročo tti milagro que janha jointtaha. ²⁷ Ncheha ra xa para ixin comida que ndattjexin, nchehe ra xa para ixin tti comida que ttjexinha co rrochjá ra iná vida naroaxin que xonhi tiempo tsjexin. Co janha, tti Xí que joixin de ngajni, rrochjaha ra tti comida mé ixin Dios Ndodana chjana joachaxin mé.

²⁸ Cottimeja jehe na joanchiangui na co ndačo na:

—¿Quehe chonda na que sinttaha na para que sinttaha na inchin Dios rinao?

²⁹ Co Jesús ndačo:

—Dios rinao que jaha ra ditticaon ra nganji na janha, tti jehe rroanha.

³⁰ Cottimeja jehe na joanchianguihi na Jesús co ndačo na ngain:

—¿Quehe señal nchao sinchehe jaha para que janha na sicon na co sitticanho na jaha? ¿Quehe cosa nchehe jaha? ³¹ Nindogoelitona na xančhjen joine na maná ngagaha jna inchin ndačo tti libro

que jitaxin Palabré Dios: “Dios joanjo niottja de ngajni para joine na.”

³² Jesús ndačo:

—Janha rrindattjo ra ndoa que jeha Moisés tti joanjo niottja de ngajni ngain jehe na; Ndo-dana danjo tti mero nio que ndoa joixin de ngajni. ³³ Ixin tti niottja que Dios danjo, mé tti jehe joinchexincanjinxin de ngajni para danjo ngain chojni iná vida naroaxin que xonhi tiempo tsjexin.

³⁴ Cottimeja vinttendačo jehe na:

—Soixin, chjana ra niottja yá cainxin nchanho.

³⁵ Co Jesús ndačo ngain na:

—Janha tti niottja que danjo vida. Tti chojni que tsí nganji co sitticaon nganji na janha, chojni mé xonhi tiempo senhe na jintta ni senhe na jinda. ³⁶ Pero inchin ondattjo ra, jaha ra ditticaonha ra masqui ovicon ni ra. ³⁷ Cainxin chojni que chjana Ndozana, tsí na nganji na janha, co cain chojni que sattí nganji na, janha sayá na, ³⁸ ixin janha joixin de ngajni pero jeha para sinttaha inchin janho rinaho, sino para sinttaha inchin rinao jehe tti rroanha na nttihi. ³⁹ Co janhi rinao Ndozana que rroanha na janha nttihi; que janha sinttatjanha ni ná chojni que jehe Ndo chjana Ndo, sino que janha sinttaxechon chojni mé de ngain tti ndadenhe ni ngain tti nchanho are ndatsjexin mundo. ⁴⁰ Co Ndozana que rroanha na rinao Ndo que cain chojni que dicon na janha, tti Xenhe Dios, co ditticaon nganji na, nimé chonda na iná vida naroaxin que xonhi tiempo tsjexin. Co janha sinttaxechon na ngain tti nchanho are tsjexin mundo.

⁴¹ Are Jesús joexin nichja jañá, chojni judío coexinhi na nichja na feo de ixin jehe Jesús ixin jehe ndačo: “Janha tti niottja que joixin de ngajni.”

⁴² Co ndačo na:

—¿Ajeha jihi Jesús, tti xitsihi José? Ján na chonxin na ndodé co janné. ¿Queñén jehe nchao ndačo ixin jehe joixin de ngajni?

⁴³ Cottimeja Jesús ndačo ngain na:

—Nichjaha ra feo. ⁴⁴ ðonhi chojni nchao tsí nganji na si tsiaoha na Ndodana que rroanha na, co janha sinttaxechon chojni mé ngain tti nchanho are ndatsjexin mundo. ⁴⁵ Ngain libroe profeté Dios ndačo janhi: “Dios sinchecoenhe cain chojni.” Jañá cain chojni que coinhi tti ndačo Ndodana co coangui na tti ndačo Ndo, chojni mé tsí nganji na janha.

⁴⁶ Jeha ixin çhonja chojni vicon Ndodana; ðonhi chojni vicon Ndo; tti vicon Ndo, mé jeho tti joixin de ngain Ndo. ⁴⁷ Janha rrindattjo ra ndoa que tti chojni que ditticaon nganji na, chojni mé chonda iná vida naroaxin que ðonhi tiempo tsjexin. ⁴⁸ Janha tti niottja que danjo iná vida naroaxin. ⁴⁹ Nindogoelitoa ra ðançhjen joine na maná ngagaha jna, pero masqui joine na mé, jehe na ndavenhe na; ⁵⁰ pero janha nichja de ixin tti niottja que joixin de ngajni que are ná chojni jine niottja jihi, chojni mé senha almé. ⁵¹ Janha mismo jehe tti niottja que danjo vida que joixin de ngajni. Tti chojni que jine nio, chojni mé rrochonda iná vida naroaxin que ðonhi tiempo tsjexin. Tti niottja que janha sanjo, mé rročo cuerpona. Janha sanjo cuerpona para que cainxin chojni ngoixin

mundo rrochonda na iná vida naroaxin que xonhi tiempo tsjexin.

⁵² Cottimeja chojni judío coexinhi vitticaoenha chó na co vinttendačo na:

—¿Quexén nchao chojni jihi rrochjá na cuerpoe sontte na?

⁵³ Jesús ndačo ngain na:

—Janha rrindattjo ra ndoa que si jaha ra sint-teha ra cuerpona janha, tti Xí que joixin de ngajni, co siha ra jnina, jaha ra rrochondaha ra iná vida naroaxin que xonhi tiempo tsjexin. ⁵⁴ Tti chojni que sine cuerpona co sihi jnina, chojni mé chonda iná vida naroaxin que xonhi tiempo tsjexin, co janha sinttaxechon chojni mé ngain tti nchanho are ndatsjexin mundo. ⁵⁵ Cuerpona, mé tti ndoa comida; co jnina, mé tti ndoa jinda que dihi na. ⁵⁶ Tti chojni que jine cuerpona co dihi jnina, chojni mé jí nganji na co janha rrihi ngain jehe. ⁵⁷ Nnodana que rroanha na chonda Ndo vida, co janha rrichon de ixin jehe Ndo, mexinxin tti chojni que sine na janha sechon de ixin janha. ⁵⁸ Janha nichja de ixin tti niottja que joixin de ngajni. Co niottja jihi jeha inchin tti maná que joine nindogoelitoa ra xančhjen, que masqui joine na mé, jehe na vintteguenhe na, ixin tti chojni que sine tti niottja que janha ndačhjan, chojni mé rrochonda iná vida naroaxin que xonhi tiempo tsjexin.

⁵⁹ Jesús joinchecoenhe na cain cosa jihi ngain servicio ngain ninngo ngain rajna Capernaum.

Are Jesús nichja de ixin tti iná vida naroaxin

⁶⁰ Are coinhi na cain tti ndačo Jesús jihi, tsje chojni que varroé Jesús ndačo na:

—Tti ndačo xí jihi atto tangui para que rrondačo na ján; ¿quensen nchao sinchehe caso tti ndačo xí jihi?

⁶¹ Cottimeja Jesús conohe tti tendačo chojni mé, co jehe joanchiangui ngain na co ndačo:

—¿Afeo tonoha ra de ixin tti janha rrindačhjan?

⁶² ¿Quehe rrořaxaon jaha ra si rroguicon ni ra janha, tti Xí que joixin de ngajni, sarrocajín tti joarihi are saho? ⁶³ Espíritu Santo, mé tti danjo iná vida naroaxin que řonhi tiempo tsjexin; cuerpoe ni čoha danjo vida mé. Co cain palabra que janha ndattjo ra, mé de ixin Espíritu co danjo iná vida naroaxin que řonhi tiempo tsjexin. ⁶⁴ Pero řa te canxion jaha ra que řa ditticaonha ra.

Jamé ndačo Jesús ixin are nacoexinxon řé jehe ovenohe quecá chojni que vaguitticaonha, co quensen tsjago ttinó sehe jehe para rrotse niningaconhe. ⁶⁵ Co Jesús ndačo:

—Mexinxin janha ndattjo ra que řonhi chojni nchao tsí nganji na si Ndodana tsiaoha.

⁶⁶ Desde are maho, tsje chojni que varroé Jesús ndacointtohe na jehe, co ivagacaoha na.

⁶⁷ Cottimeja Jesús joanchianguihi tti tteyó chojni que vacao co ndačo:

—¿Acai jaha ra rinao ra satsji ra?

⁶⁸ Pero Simón Pedro ndačo:

—Soixin, ¿quensen ngain nchao satsji na? Palabra soixin palabra que danjo iná vida naroaxin que řonhi tiempo tsjexin. ⁶⁹ Janha na ovitticanho na, co nona na que soixin tti Cristo tti Dios rroanha co tti Xenhe Dios que jichon.

⁷⁰ Jesús ndaĉho:

—Janha coinchiá tti tteyó jaha ra. Co ixinha jamé, ná de jaha ra ná chojni inchínji.

⁷¹ Are ndaĉho Jesús jihi, Jesús nichja de ixin Judas Iscariote, xitsihi iná Simón, ixin jehe Judas tti joindaĉho para tse na Jesús masqui jehe Judas ná de tti tteyó chojni que vacao Jesús.

7

Xanchó Jesús vaguitticaonha xan ngain

¹ Después de cain jihi, Jesús vangaria ngain region Galilea. Jehe joinaoha cjoí ngain Judea ixin nttiha chojni judío que vinttechonda joachaxin joinao na narrogoenxon na. ² Pero ixin tiempo mé joiconchian tti nchanho que chojni judío vanchechjian tti quiai de chozas, mé ná de tti quiai que chojni Israel chonda, ³ mexinxin cain xanchó Jesús ndaĉho xan ngain:

—Tadariha nttihi; tji para Judea para que cain chojni que te nttiha, tti nite de acuerdo de ixin tti ndaĉho jaha, cai sicon na tti nchehe jaha. ⁴ Ixin si ná ni que rinao ni tsje chojni satsoan ni, jehe ni ncheha ni cain cosa jimao. Si jaha nchao nchehe cain cosa inchin cain cosa jihi, jaha nchehe ngattoxon con cainxin chojni ngoixin mundo.

⁵ Xanchó Jesús vinttendaĉho xan jańá ixin vaguitticaonha xan ngain jehe. ⁶ Cottimeja Jesús ndaĉho:

—Āa ttiha nchanho para que janha tsononxin na ngattoxon con chojni que nchehe tti jianha, pero para ixin jaha ra quexeho nchanho nchao tsononxin ra ngattoxon con chojni mé.

⁷ Chojni que joxon ncheḡoxinhi cosa ngataha nontte čoha rroningaconha ra na, pero janha ningaonna na ixin janha ndattjan na claro ixin tti jehe na tenchehe na jianha jí. ⁸ Sattji jaha ra ngain quiai; janha tsjiha ixin nchanho ḡa ttiha para que janha tsji.

⁹ Co después que Jesús ndache xanchó jihi, jehe vittohe ngain Galilea nchion nchanho.

Are Jesús cjoí ngain tti quiai de chozas

¹⁰ Pero después de que savinttecji xanchó Jesús, jehe Jesús caí sacjoi ngain quiai mé, masqui ḡonhi chojni conohe ixin jehe cjoí jimao. ¹¹ Chojni judío que vinttechonda joachaxin vinttecjé na Jesús ngain quiai mé, co ndačo na:

—¿Quettinó jí xí jiha?

¹² Co de ngayé cainxin chojni ngain quiai, nttiha tsje ni tenichja de ixin jehe Jesús. Canxion na ndačo na: “Jehe ná xí jian”; pero icanxin na ndačo na: “Jeha jian ixin ncheyehe chojni.”

¹³ Pero ḡonhi chojni cjoao chó sén para icha chojni rroquinhi na de ixin Jesús ixin ḡaon na ngain chojni judío que vinttechonda joachaxin.

¹⁴ Ojidiji inchin ngosinenxin quiai are Jesús joixinhi ngaxinhi nihngo icha importante co coexinhi joinchecoenhe chojni. ¹⁵ Co chojni judío que vinttechonda joachaxin goan na admirado co ndache chó na:

—¿Queḡén noenxin xí jihi anto tsje cosa co jehe xa ḡonhi tiempo coangui xa Palabré Dios inchin ján na?

¹⁶ Jesús ndačo ngain na:

—Tti janha nttacoanha ra jeha jeho tti nona janha, sino cosa que nohe tti rroanha na janha nttihi. ¹⁷ Si čhonja chojni rinao sinchehe tti rinao Dios, chojni mé satsoan si tti rrinttacoanha joixin de ngain Dios o ani jeho cosa que janha rinaho. ¹⁸ Tti chojni que ndačo inchin jeho rinao, chojni mé nchehe para que icha chojni sinchesayehe na jehe; pero tti chojni que nchehe que tsosayehe tti rroanha jehe, chojni mé nichja tti ndoa co ŋonhi tti ndoaha nichja chojni mé.

¹⁹ Moisés chjá ra ley, co ni ná de jaha ra ditticaon ley mé. ¿Quedonda rinao ra nasoenxon ni ra?

²⁰ Chojni mé ndačo na ngain Jesús:

—Jaha chonda ná espíritu jianha, mexinxin jaho tti ŋaxaon que ixin janha na rinaho na nasoenxon ra jaha, pero janha na ŋaxaonha na jamé.

²¹ Jesús ndačo ngain na:

—De ixin nacoaxinxon cosa que janha jointtaha ngain nchanho que nchejogaha ni, cain jaha ra doan ra admirado. ²² Pero Moisés chjá jaha ra costumbre para chjehe ra cada xanxichjan letsjochjan tti ŋohe que dinhi circuncisión, (masqui coexinxin ngain nindogoelitoa ra ŋančhjen que cjoí icha saho que Moisés.) Co mexinxin jaha ra chjehe ra naná xanxichjan letsjo ŋohe mé masqui ngain nchanho que nchejogaha ni. ²³ Nchao jí remé, si para sinchehe ni inchin ttetonha ley que vayé Moisés jaha ra chjehe ra ná xanxichjan letsjo ŋohe masqui ngain nchanho que nchejogaha ni, ¿quedonda doñao ra nganji na ixin jointtaxingamá ngoixin cuerpoe ná xí ngain nchanho que nchejo-

gaha ni? ²⁴ Ncheha jaha ra juzgado jeha inchin
 xaxaon ra; nchehe ra inchin jiquinixin.

Jesús ndacho ttinó joixin jehe

²⁵ Cottimeja canxion chojni que vintte Jerusalén
 coexinhi na joanchianguihi chó na co ndacho na:

—¿Ajeha xí jihi tti rrittjé na ixin nasoenxon na?

²⁶ Co yá jinichja xa co cain chojni tettinhi, co ni ná
 chojni xonhi ndache xa. ¿O ani cain chojni que
 chonda joachaxin ngain autoridad xaxaon que
 ixin xí jihi tti Cristo que Dios rroanha? ²⁷ Pero
 ján na noa na ttinó joixin xí jihi, co are tsí Cristo,
 tti Dios rrorroanha, xonhi chojni tsonohe ttinó
 tsixin.

²⁸ Jehe Jesús tajinchecoenhe chojni ngaxinhi ni-
 hngo icha importante, co are coinhi Jesús cain jihi,
 jehe ndacho sén:

—¿Ajamé ixin chonxin ni ra co noha ra ttinó
 joixin janha? Pero janha joiha inchin janho ri-
 naho, janha joihi ixin tti rroanha na janha jehe
 anto jian co jehe mé tti jaha ra ditticaonha ra.

²⁹ Janha ditticanho jehe ixin joixin de ngain jehe,
 co jehe rroanha na.

³⁰ Cottimeja joinao na rrotse na Jesús para rro-
 quiaxinhi na ngain cárcel, pero ni ná na joincheha
 na ixin xa jeha nchanho para que jehe siaxinhi.

³¹ Pero tsje chojni vitticaon na jehe, co ndacho na:

—Are tsí Cristo, ¿apoco sinchehe icha tsje mila-
 gro que xí jihi?

Xifariseo joinao xa rroquiaxinhi xa Jesús

³² Xifariseo vinttequinhi xa tti vandacho chojni
 de ixin Jesús, co jehe xa co canxion xidána que
 vaquetonha ngain icha xidána, cain xí mé rroanha

xa xipolicié nihngo icha importante para rrotse xa Jesús. ³³ Cottimeja Jesús ndačo:

—Janha sarihi nganji ra pero seha, cottimeja sarrocjan na ngain tti rroanha na. ³⁴ Jaha ra tsjé ni ra pero sinchiha ni ra ixin jaha ra čhoča tsji ra ngain tti janha sarihi.

³⁵ Cottimeja chojni judío que vinttechonda joachaxin coexinhi na vintteganchianguihi chó na:

—¿Ttinó satsji xí jihi que ján na čhoča sonttó na xa? ¿Apoco satsji xa ngain icha chojni judío que te ngayé chojni griego que te ngain nontte icha cjin para sinchecoenhe xa chojni griego?

³⁶ ¿Quehe rročo yá tti ndattjo na xa: “Tsjé ni ra pero sinchiha ni ra ixin jaha ra čhoča tsji ra ngain tti janha sarihi”?

Jesús inchin jinda que danjo vida naroaxin

³⁷ Tti último nchanho de quiai, nchanho mé nchanho icha importante. Co nchanho mé Jesús vingattjen co ndačo sén:

—Si čhonja chojni venhe jinda, tsí nganji na co sihi jinda. ³⁸ Inchin ndačo ngain tti jitaxin Palabré Dios; de ngain ansén tti chojni que sitticaon na janha, nttiha rročinxin vida naroaxin inchin jinda čhinxin de ngain ná manantial.

³⁹ Conixin yao, Jesús joinao ndačo que cain chojni que sitticaon jehe sayé na Espíritu Santo; ixin tiempo mé řa joiha Espíritu mé ixin Jesús řa sacojinha para ngajni.

Quexén ndachjea chojni

⁴⁰ Canxion na ngayé chojni nttiha, are coinhi na jihi, ndačo na:

—Ndoa xí jiji tti profeté Dios que ján na chonhe na.

⁴¹ Icanxin na ndačo na:

—Xí jiji tti Cristo que Dios rroanha.

Pero icanxin na ndačo na:

—¿Queĕén tsixin Cristo ngain regioen Galilea?

⁴² Tti jitaxin Palabré Dios ndačo que Cristo chonda que tsixin de ngain ná chojní rey David, co chojní mé tsixin de Belén, ŕajeho rajné David.

⁴³ Jańá que chojni ndachjea na de ixin Jesús.

⁴⁴ Co canxion na joinao na rrotse na Jesús para rroquiaxinhi na, pero ŕonhi ni tse.

Chojni que ttetonha ngain juzgado vitticaonha na Jesús

⁴⁵ Xipolicie níhngo icha importante savinttecjan xa para ngain tti te xifariseo co xidána que vaquetonha ngain icha xidána, co cain xí jiji joanchiangui xa ngain xipolicia co ndačo xa:

—¿Quedonda joicoha ra xa?

⁴⁶ Co xipolicia vinttendačo xa:

—¡ŕonhi tiempo ná chojni nichja jian inchin nichja xí yá!

⁴⁷ Cottimeja jehe xifariseo vinttendačo xa ngain xipolicia mé:

—¿Acai jaha ra jointtayaha ra xí mé? ⁴⁸ ¿Apoco canxion xittetoan na ján na o xí que ttetonhe xifariseo vintteguitticaon xa de ixin jehe xí mé?

⁴⁹ Pero chojni que ditticaon jehe xí mé chonxinha na ley que vayé Moisés, co Dios sinchecastigá na.

⁵⁰ Co nttiha jí Nicodemo, jehe cai ná de jehe xifariseo, tti cjoí para joitsjehe Jesús are ná ttie; co mé ndačo ngain icha xifariseo:

⁵¹ —Pero leya na ttetonha ixin ján na čhoha sonttoho na jie ngain ná xí si řa ttinha na saho palabré xa para jamé tsonoa na quehe joinchehe xa.

⁵² Cottimeja vinttendačo xa ngain jehe Nicodemo:

—¿Ajaha cai joixin de Galilea? Tsjehe ngain tti jitaxin Palabré Dios, co sicon que ni ná profeta joixinha de Galilea.

Nčhí que deajoacaho iná xí

⁵³ Cottimeja cada xa savinttecji xa para nchian-doha xa.

8

¹ Pero Jesús sacjoi para ngagaha tti jna dinhi Nttaolivo, ² co ndoexin are ovingasán, Jesús sacjan para ngain nihngo icha importante iná. Cainxin chojni conchienne na ngain Jesús, co jehe tavehe co coexinhi joinchecoeha na. ³ Cottimeja ximaestroey ley co xifariseo vinttequiaho xa ná nčhí que dintteguittja xa mero tajjoacaho nčha iná xí. Coín xa nčhí mé ngosine cainxin chojni que te nttiha, ⁴ co vinttendačo xa ngain Jesús:

—Maestro, nčhí jiji vittja na nčha mero tajjoacaho nčha iná xí. ⁵ Co ley que vayé Moisés ttetonna na que nasoenxon na conixin řo cain nčhí que nchehe janhi. ¿Jaha, quehe čho?

⁶ Jehe xa vinttendačo xa jiji para joaquehe xa prueba ngain Jesús co jamé rroconohe xa de quehe rrocjanguixin xa Jesús. Cottimeja Jesús visé co coexinhi cjin ngataha nontte conixin dedoe. ⁷ Pero jehe xa joinchehe xa sigue joanchianguihi xa. Cottimeja Jesús xendoa co ndačo ngain xa:

—Quexeho jaha ra que xonhi cosa jianha joinchehe ra ttedoehe ra ncha saho xo.

⁸ Co jehe cjan visé co joinchehe sigue cjin ngataha nontte. ⁹ Pero cain jehe xa co cain chojni que te nttiha are vinttequinhi na jiji jehe na feo conohe na ixin xaxaon na que jehe na cai joinchehe na cosa jianha. Co vinttegačhje ná na co ná na, saho vinttegačhje ni icha nttanttaxí, cottimeja vinttegačhje tti ni icha chjan hasta cainxin na vinttegačhje na co vittohe jeho Jesús conixin jehe nchí mé. ¹⁰ Cottimeja xendoa Jesús, ixonhi icha chojni vicon, jeho jehe nchí mé. Co Jesús ndačho ngain ncha:

—¿Ttinó te chojni que cjoanguiha? ¿Ani ná na goenha na?

¹¹ Jehe ncha ndačho ncha ngain Jesús:

—Nahi, ni ná na.

Cottimeja Jesús ndačho ngain ncha:

—Pues ni janha čoha sonhe. Jaxon sattji, co icjanha nchehe cosa jianha yá.

Jesús jehe tti joadingasán de ngoixin mundo

¹² Jesús nichjé chojni iná, co ndačho ngain na:

—Janha tti joadingasán de ngoixin mundo. Tti chojni que sitticaon na janha rrochonda na jehe tti joadingasán mé que sanjo iná vida naroaxin ngain na, co xonhi tiempo sacji na ngain tti naxin xehe.

¹³ Cottimeja cain xifariseo ndačho xa ngain Jesús:

—Jaho rrinichja jian de ixin jaho, co ixin jaho rrinichja yá xonhi rentte.

¹⁴ Jesús ndačho ngain xa:

—Tti janha rrindačhjan ján rentte, masqui janho rrindačhjan de ixin janha, ixin janha nona ttinó joixin co ttinó satsji. Pero jaha ra noaha ra ttinó joixin janha ni noaha ra ttinó satsji. ¹⁵ Jaha ra nchejuzgá ra inchin nohe chojni nttihi ngataha nontte. Janha nttaha juzgado ni ná chojni; ¹⁶ pero si janha rrojinttaha juzgado, janha sinttaha inchin jiquininxin, ixin jaonha tti nttaha juzgado, sino Ndodana que rroanha na, Ndo mé Ndo nchehe juzgado conixin janha. ¹⁷ Ngain ley que chonda ra jitaxin que are yó chojni testigo rrondačo xajeho, chonda que sitticaon ni chojni mé. ¹⁸ Pues, nchao remé, janha mismo ná testigo na de ixin janho ixin ndačhjan que janha jian na, co Ndodana que rroanha na, jehe Ndo iná testigo ixin ndačo Ndo xajeho de ixin janha.

¹⁹ Cottimeja vintteganchianguihi xa Jesús co ndačo xa:

—¿Quettinó jí Ndodá?

Jesús ndačo ngain xa:

—Jaha ra ttinxinha ra tti janha rrinttaha, jamé cai tsonoaha ra de ixin Ndodana. Si rroquinxin ra tti janha rrinttaha, cai rroconoha ra de ixin Ndodana.

²⁰ Jesús ndačo cain cosa jihi are jehe jitjagoe chojni ngaxinhi nihngo icha importante, mero ngain lugar tti te cajé tomí alcancía. Pero xonhi chojni tse Jesús para rroquixinhi na Jesús ixin xa jeha tiempo para que jehe rroquixinhi.

Jesús ndache chojni ixin jehe na čhoha tsji na ngain lugar tti jehe tsji

²¹ Jesús cjan ndačo ngain na iná:

—Janha satsji co jaha ra tsjé ni ra, co are ndasenhe ra xa sintteca ra tti jianha que nchehe ra, mexinxin tti janha satsji, jaha ra čoha tsji ra.

²² Cottimeja chojni judío que vinttechonda joachaxin ndačo na:

—¿Apoco sasiguenhe jehó, mexinxin ndačo que ján na čoha tsjin na tti satsji jehe?

²³ Cottimeja Jesús ndačo ngain na:

—Jaha ra de nttihi ngain mundo ra, pero janha de noi na: jaha ra de ngain mundo jihi ra, pero janha jeha de ngataha nontte jihi na. ²⁴ Mexinxin ndattjo ra que are senhe ra xa sintteca ra tti jianha que nchehe ra ixin si ditticaonha ra que janha mero inchin janha ndačhjan, senhe ra co xa sintteca ra tti jianha que nchehe ra.

²⁵ Cottimeja jehe na joanchianguihi na Jesús co ndačo na:

—¿Quensen jaha?

Co Jesús ndačo ngain na:

—Ondattjo ra de are saho. ²⁶ Janha chonda atto tsje que rrondačhjan de ixin jaha ra co sinttajuzgá ra. Co tti rroanha na janha, jehe nichja tti ndoa, co janha ndačhjan ngain chojni de mundo jihi jehó tti coian nichja jehe tti rroanha na.

²⁷ Pero jehe na coinxinha na ixin ndačo jehe de ixin Dios Ndodé. ²⁸ Mexinxin Jesús ndačo ngain na:

—Are jaha ra rrotsinhi ni ra noi janha, tti Xí que joixin de ngajni, cottimeja tsonoha ra que janha ndoa inchin janha ndačhjan, co ixin xonhi ndačhjan inchin janho rinaho, sino que janha jehó ndačhjan tti cjoagohna Ndodana. ²⁹ Ixin Ndodana que rroanha na janha, jehe Ndo jí Ndo

nganji na; co jehe Ndo ttinttonaha Ndo janho, ixin janha cainxin tiempo nttaha inchin jehe Ndo rinao Ndo.

³⁰ Are Jesús ndačo jiji tsje na vitticaon na ngain jehe.

Jesús ndačo quexehe tti chojni xenhe Dios co quexehe tti chojni inchni

³¹ Cottimeja Jesús ndache chojni judío que vitticaon ngain jehe:

—Si jaha ra sitticaon ra cainxin tiempo tti janha ndattjo ra, jaha ra ndoa sinhi ra chojnina. ³² Co rrochonxin ra tti ndoa, co tti ndoa rrochjá ra libertad.

³³ Jehe na ndačo na ngain Jesús:

—Janha na nirazé Abraham na co xonhi tiempo cjo na esclavo de ni ná chojni. ¿Queén ndačoxin jaha ixin rrochonda na libertad?

³⁴ Jesús ndačo ngain na:

—Janha rrindattjo ra ndoa que cainxin chojni que nchehe jianha, chojni mé tti te inchin esclavo de ngain cosa jianha. ³⁵ Ná esclavo tadeha ngain nchiandoha xinajni para cainxin tiempo; pero ná xenhe xinajni tadehe xan ngain nchiandoha ndodé xan para cainxin tiempo. ³⁶ Jamé janha, tti Xenhe Dios, rrittjenguijna ra para que isintteha ra esclavo de ngain cosa jianha, para que jaha ra ndoa sintte ra inchin chojni que chonda libertad.

³⁷ Onona que jaha ra razé Abraham, pero rinao ra nasoexon ni ra janha ixin rinaoha ra tti janha ndattjo ra. ³⁸ Janha nichja tti cjoagohna Ndodana co jaha ra nchehe ra tti dindattjo ra ndodá ra.

³⁹ Jehe na vinttendačo na ngain Jesús:

—Ndodana na jehe Abraham.

Pero Jesús ndačo ngain na:

—Si jaha ra rrocji ra ndoa razé Abraham, jaha ra rrojinchehe ra tti jehe joinchehe. ⁴⁰ Co ixinha jamé, masqui ndattjo ra tti ndoa que Dios cjoagohna, jaha ra rinao ra nasoenxon ni ra. ¡Co Abraham xonhi tiempo joinchehe jañá! ⁴¹ Jaha ra nchehe ra xajeho tti nchehe ndodá ra.

Cottimeja jehe na ndačo na ngain Jesús:

—Janha na jeha chjan na que digoama ixin janha na chonda na nacoaxinxon Ndodana na que mé jehe Dios.

⁴² Cottimeja Jesús ndačo ngain na:

—Si ndoa Dios rrocji Ndodá ra, jaha ra rrojinao ni ra janha ixin janha joixin de ngain Dios co nttihi rrihi. Joiha janha inchin janho joinaho, Dios tti rroanha na. ⁴³ ¿Quedonda čhoha jaha ra ttinxin ra tti janha ndattjo ra? Mé ixin jaha ra rinaoha ra ttinhi ra joajnana. ⁴⁴ Tti ndodá jaha ra, mé tti inchínji; jaha ra chojní jehe mé, co rinao ra sinchehe ra tti jehe rinao. Inchínji jehe tti nadoenxon chojni desde are saho. Co jehe xonhi tiempo jí ngain tti ndoa co xonhi tiempo nichja tti ndoa. Are jehe nichja tti ndoaha, jehe nichja de ixin jehe mismo ixin jehe puro ndoaha co jehe tti ndodé cainxin chojni que nichja ndoaha. ⁴⁵ Pero ixin janha nichja tti ndoa, mexinxin jaha ra ditticaonha ni ra. ⁴⁶ ¿Quensen de jaha ra nchao rrondačo que janha jointtaha jianha? Pero si janha ndačhjan tti ndoa, ¿quedonda ditticaonnaha ra? ⁴⁷ Tti chojní Dios, jehe na ttinhi na palabré

Dios, pero ixin jaha ra jeha chojní Dios ra, mexinxin rinaoha ra ttinhi ra.

Cristo ovehe icha saho que Abraham

⁴⁸ Cottimeja jehe tti chojni judío que vinttechonda joachaxin ndačo na ngain Jesús:

—Janha na chonda na razón are ndačhjan na que jaha ná chojni de ngain nonttehe Samaria co chonda ná espíritu jianha.

⁴⁹ Jesús ndačo ngain na:

—Janha chondaha ni ná espíritu jianha. Tti janha nttaha mé para nttasayá Ndodana, co jaha ra nichja ra feo de ixin janha. ⁵⁰ Janha taha joachjaon si sinchesayana ra o ni nahi, pero masqui jamé, jí ná tti rinao que tsosayana, co jehe nchehe juzgado ixin atencesayana ra o ni nahi. ⁵¹ Janha rrindattjo ra ndoa que tti chojni que nchehe caso tti ndačhjan, chojni mé xonhi tiempo ndasenhe.

⁵² Cottimeja jehe chojni judío mé vinttendačo na ngain Jesús:

—Jaxon seguro chonxin na que jaha chonda ná espíritu jianha. Abraham co cain profeté Dios ndavintteguenhe na, co jaha ndačo: “Tti chojni que sinchehe caso tti janha ndačhjan, xonhi tiempo ndasenhe na.” ⁵³ ¿Apoco jaha icha jian que ndodana na Abraham? Jehe ndo mé venhe ndo co cain profeté Dios cai ndavintteguenhe na. ¿Quensen toenao jaha?

⁵⁴ Jesús ndačo ngain na:

—Si janha jitosayana janho, tti janha rrinttaha xonhi rentte. Pero tti nchesayana janha mé Ndo-dana, co jehe Ndo mé mero tti ndačo jaha ra que

jehe mé tti Dios de jaha ra. ⁵⁵ Pero jaha ra chonxinha ra de ixin jehe Ndo, janha nchoe ján chonxin Ndo. Si janha rrondačhjan que chonxinha Ndo, janha rronichja ndoaha inchin jaha ra cai. Pero janha ndoa chonxin Ndo, co ján nttaha caso tti jehe Ndo ndačo Ndo. ⁵⁶ Abraham, tti ndogoelitoa ra řančhjen, anto ché ixin jehe venohe que janha sihi ngataha nontte; co jehe vicon co anto ché.

⁵⁷ Cottimeja chojni judío mé vinttendačo na ngain Jesús:

—Āa chondaha jaha ni cincuenta nano, ¿queřén ndačoxin ixin vicon Abraham?

⁵⁸ Jesús ndačo ngain na:

—Janha rrindattjo ra ndoa que icha saho que Abraham vehe, janha ojoarihi.

⁵⁹ Cottimeja vinttecjé na řo para rrořanguí na Jesús, pero jehe tavema ngayehe ni icha, cottimeja jimao vačhje yexin de ngayehe na co de ngaxinhi nihngo icha importante para sacjoi.

9

Jesús joinchexingamehe ná xí que čhoha vaguicon

¹ Are jidatto Jesús ngain ná lugar, jehe vicon ná xí que desde are diconcjihí xa čhoha vaguicon xa.

² Co cain chojni que vacao Jesús joanchiangui na ngain jehe co ndačo na:

—Maestro, ¿quedonda diconcjihí xí yá jańá ixin čhoha dicon xa? ¿Puede de ixin tti jianha que joinchehe ndodé xa o janné xa, o ni de ixin tti jianha que jehe xa joinchehe xa?

³ Jesús ndačo:

—Jeha de ixin tti jianha que jehe xí yá joinchehe xa ni jeha de ixin tti jianha que joinchehe nindoha xa. Jañá jí xí yá para que de ngain xa rroḡago tti nchao nchehe Dios. ⁴ Jai que nchanho janha chonda que sinttaha ḡé tti rroanha na nttihi ixin otsí ttie que ni ná chojni čoha sinchehe ḡa. ⁵ Jai que janha ḡa rrihi nttihi ngataha nontte jihi, janha inchin tti joadingasán de ngoixin ngataha nontte jihi.

⁶ Are joexin ndačo Jesús cain jihi, jehe cointtji nttatté ngataha nontte co joinchechjian nchion nchetjaho conixin nttatté, co coinga nche nganito con tti xí que vaguiconha. ⁷ Cottimeja ndačo Jesús ngain tti xí mé:

—Janché, ttji dicontti jinda ngain estanque de Siloé.

Co Siloé rročo Tti Joí.

Tti vaguiconha mé cjoí co joicontti jinda, co are jehe cjan, onchao vicon. ⁸ Cottimeja cain nivecinoe, co cain tti nivicon are saho ixin jehe vaguiconha, vinttendačo na:

—¿Ajeha xí jihi xí que vaganchiagaha?

⁹ Canxion na ndačo na:

—Ján, jehe xa.

Icanxin na ndačo na:

—Nahi, jeha xa, pero inchin jitsjehe xí mé jitsjehe xí jihi.

Pero jehe xí que vaguiconha mé ndačo xa:

—Ján, janha.

¹⁰ Cottimeja vintteganchianguihi na xí mé co vinttendačo na:

—¿Queḡén conhe ixin jaha onchao dicon?

¹¹ Jehe xa ndačo xa:

—Tti xí jiha que dinhi Jesús joinchechjian xa nchetjaho, co coinga xa nche nganito con co ndachjenji na xa: “Janché, ttji ngain estanque de Siloé co tontti jinda.” Mexinxin janha cjoí, co are contti jinda, janha onchao vicon.

¹² Cottimeja jehe na joanchiangui na co ndačo na:

—¿Quettinó jí xí mé?

Co jehe tti vaguiconha ndačo:

—Janha nonaha.

Xifariseo joanchianguihi tti xí que vaguiconha

¹³ Cottimeja joicao na jehe tti vaguiconha mé ngain xifariseo. ¹⁴ Co tti nchanho que Jesús joinchechjian nchetjaho co joinchexingamehe con jehe tti xí que vaguiconha, nchanho mé nchanho para nchejogaha ni. ¹⁵ Mexinxin chojni fariseo cai joanchianguihi na jehe tti xí que vaguiconha ixin quexén jehe onchao dicon. Co jehe ndačo:

—Xí mé coinga xa nchetjaho nganito con, co contti jinda; co jai onchao dicon.

¹⁶ Cottimeja canxion xifariseo vinttendačo xa:

—Tti xí que joinchehe jiji jeha chojni Dios ixin chondaha xa respeto ngain nchanho que nchejogaha ni.

Pero icanxin xa vinttendačo xa:

—¿Quexén ná xí que nchehe jianha nchao sinchehe xa ná milagro?

Co mexinxin jehe xa ndachjea xa yó grupo. ¹⁷ Co cjan xa iná joanchianguihi xa jehe tti vaguiconha mé, co ndačo xa:

—¿Co jaha quehe ndačo de ixin tti xí que chjá con?

Co jehe ndačo:

—Janha ndačhjan que xí mé ná profeté Dios.

¹⁸ Pero chojni judío que vinttechonda joachaxin joinaoha na rroguitticaon na que ixin xí mé vaguiconha xa co are mé onchao vaguicon xa hasta que vayeja na ndodé xa co janné xa, ¹⁹ co joanchianguihi na na co ndačo na:

—¿Ajihí tti xitsiha ra, que jaha ra ndačo ra que de concjiho xa vaguiconha xa? ¿Quexén jai onchao dicon xa?

²⁰ Ndodé co janné xí mé ndačo na:

—Nona na que jihí xitsihna na co vaguiconha xa de concjiho xa, ²¹ pero nonaha na quexén jai jehe xa onchao dicon xa, ni nonaha na quensen joinchexingamehe jmacon xa. Danchianguihi ra xa, ochonda xa tsje nano, co jehe xa nchao rrochjá ra xa razón.

²² Nindoha jehe tti vaguiconha ndačo na jihí ixin xáon na ixin chojni judío que vinttechonda joachaxin ocjoao chó na ixin quexeho chojni que rrondačo ixin Jesús jehe mé tti Cristo que Dios rroanha, chojni que rrondačo jihí senguixin na de ngaxinhi ningoe na. ²³ Mexinxin nindoha jehe tti vaguiconha ndačo na: “Danchianguihi ra xa, otsje nano chonda xa.”

²⁴ Cottimeja cain chojni judío cjan na vayé na jehe tti xí que vaguiconha, co ndačo na ngain:

—Ndachjenji ni ra tti ndoa ngattoxon con Dios quexén conha ixin janha na nona na que xí yá nchehe xa jianha.

²⁵ Cottimeja jehe tti xí que vaguiconha ndačo ngain na:

—Janha nonaha si jianha xa ani nahi. Janha jehonona que janha vaguiconha co jai odicon.

²⁶ Co jehe na cjan na joanchianguihi na iná co ndačo na:

—¿Quehe joinchehe xa nganji? ¿Queñen joinchehe xa para joinchecjian xa jmacon?

²⁷ Jehe tti vaguiconha ndačo:

—Ondattjo ra, co ncheha ni ra caso, mexinxin ¿quedonda rinao ra que janha rrocjan na rrondattjo ra iná? ¿Asoixin ra cai rinao ra sitticaon ra xí mé?

²⁸ Cottimeja jehe na nichja na feo ngain jehe tti vaguiconha mé, co ndačo na ngain:

—Jaha ditticaon xí mé, pero janha na ditticanho na Moisés. ²⁹ Janha na nona na que Dios nichja ngain Moisés; pero xí yá ni nonaha na ttinó joixin xa.

³⁰ Tti xí que vaguiconha ndačo ngain na:

—Janha ttianxinha queñen xaxaon ra de ixin xí yá. Soixin ra noaha ra quettinó joixin xa, pero janha nona que ngain Dios joixin xa ixin joinchecjian xa jmacon na. ³¹ Ján na noa na jian que Dios ttinha tti ndačo chojni que nchehe jianha, jehon ttihi ngain chojni que nchesayehe jehe co nchehe na tti rinao jehe. ³² xonhi tiempo coinhi ni que ná chojni joinchecjian jmacon ná chojni que desde concjiho diconha. ³³ Si xí jihi jeha ngain Dios rroquixin xa, jehe xa čoha rrojinchehe xa jihi.

³⁴ Cottimeja chojni judío ndačo na:

—Jaha anto jianha desde concjiha ¿co jai arinao sinchecoanna ni ra de ixin Dios?

Co venguixin na de ngaxinhi nihngo.

Tti chojni que ditticaonha Cristo te na inchin tti chojni que diconha

³⁵ Jesús conohe ixin vengui na jehe tti vaguiconha mé, co are vetan Jesús, Jesús ndačo ngain:

—¿Aditticaon jaha ngain Xenhe Dios?

³⁶ Co jehe tti vaguiconha mé ndačo:

—Ndachjenji na soixin, quensen mé, para que janha sitticanho ngain.

³⁷ Jesús ndačo:

—Jaha ovicon; mé janha tti jaha rritjao jaxon.

³⁸ Cottimeja jehe tti vaguiconha mé vettoxin nttajochjihi ngain Jesús, co ndačo:

—Ján, ditticanho, soixin.

³⁹ Cottimeja ndačo Jesús:

—Janha joihi ngataha nontte jihi para que janha sinttajuzgá chojni para que tti chojni que te inchin tti diconha, rročo ixin jehe na chonxinha na de ixin Dios, para que jai chojni mé nchao sintte na inchin tti dicon ixin sitticaon na nganji na janha. Co para que tti chojni que te inchin tti dicon, rročo ixin jehe na ndačo na que anto chonxin na de ixin Dios, chojni mé sintte na inchin tti diconha ixin sitticaonha na nganji na janha.

⁴⁰ Cottimeja canxion xifariseo que te ngain Jesús nttiha vinttequinhi xa jihi, co vintteganchianguihi xa Jesús co ndačo xa:

—¿Apoco janha na cai diconha na?

⁴¹ Jesús ndačo ngain xa:

—Si jaha ra rroguintte ra inchin tti diconha, xonhi rroguintteca ra de ixin tti jianha que nchehe

ra. Pero ixin jaha ra ndačo ra que dicon ra, mexinxin tecaxin ra tti jianha que nchehe ra.

10

Ejemploe corré coleco

¹Janha rrindattjo ra ndoa que tti chojni que dixinxinha de ngain puerté corré coleco, co dixinxin ojé lado, chojni mé chehe ixin tté coleco. ²Pero tti chojni que dixinxin de ngain puerta, chojni mé tti ttingaria jehe coleco co dicao cuidado de ixin jehe va. ³Tti jinda puerta jehe danttjé puerta para dixinhi jehe tti ttingaria coleco, co jehe va datsoan va tté jehe. Co jehe dayé va de ixin nombré va co dantsjexin va de corra. ⁴Co are ottjexin dantsje cainxin coe, jehe ditaonhe va nttiha co jehe va rroé va ixin datsoan va tté jehe. ⁵Co jehe va rroeha va iná chojni que chonxinha va, sino que sattinga va de ngain ixin chonxinha va tté chojni mé.

⁶Jesús ndache xifariseo ejemplo jihi, pero jehe xa coinxinha xa quehe rročo tti ndačo Jesús.

Jesús tti chojni que jian ttingaria coleco

⁷Cottimeja Jesús cjan ndache xa:

—Janha rrindattjo ra ndoa que janha tti puerta na tti dixinxin coleco. ⁸Cainxin chojni que jói icha saho que janha, tti nindačo que jehe na joixin na de ngain Dios, chojni mé tti chehe, pero coleco joincheha va caso. ⁹Janha tti puerta na; co tti chojni que sixinhi de ixin janha, chojni mé janha tsjenguijna para rrochondaha na castigo de cain cosa jianha que nchehe. Co sehe inchin ná coleco que dixinhi co dačhje de ngain corra co dittja va cachji que jine va.

¹⁰ 'Tti chehe jeho ttí para tté co para nadoenxon chojni, co para nchexantte, pero janha joihi para rrochonda ra iná vida naroaxin, co cai para que janha rrochjaha ra ngain vida mé tsje tti jian que danjo Dios. ¹¹ Janha tti chojni que jian ttingaria coleco. Tti jian ttingaria coleco jehe danjo vidé para ixin jehe va, ¹² pero tti nchehe xa jeho para sacha tomi, are jehe dicon ttí condanixa, jehe ttinttohe coleco co jehe sattinga ixin jehe jeha tti mero ttingaria coleco co ixin coleco jeha coe jehe. Co condanixa tonchjequé va coleco co tse va va. ¹³ Xí jihi sattinga xa ixin nchehe xa xa jeho para dacha xa tomi, co jehe xa ndosenha xa coleco.

¹⁴⁻¹⁵ 'Janha tti chojni que jian ttingaria coleco. Jañá inchin Ndodana chonxin Ndo jian ngain ansenna, jamé janha cai chonxin jian ngain ansén jehe Ndo; co xajeho jamé janha chonxin jian ngain ansén cain colecona, co jehe va cai chonxin va jian ngain ansenna. Co janha sanjo vidana para ixin jehe cona. ¹⁶ Cai janha chonda icanxin coleco que jeha de ngain corra jihi, co chonda que siquinha va cai. Jehe va sitticaon na va janha, co sehe nacoaxinxon tájo co nacoaxinxon tti tsingaria va.

¹⁷ 'Ndodana rinao na Ndo janha ixin janha sanjo vidana para nchao rrocjan na sayá vida iná. ¹⁸ xonhi chojni santsjena vidana, janho tti sanjo vidana ixin janha jañá rinaho. Janha chonda joachaxin para sanjo vidana, co cai chonda joachaxin para rrocjan na sayá vidana iná. Jehe jihi tti coetonna Ndodana.

¹⁹ Are chojni judío coinhi na cain palabra jihi, jehe na cjan na chjea na yó grupo iná. ²⁰ Tsje jehe

na ndačo na:

—¿Quedonda nchehe ra caso xí yá? Jehe xa chonda xa ná espíritu jianha co ndadixenga xa.

²¹ Pero icanxin na ndačo na:

—Xonhi chojni que chonda espíritu jianha nchao rronichja jañá. ¿Apoco ná espíritu jianha nchao rrochjé jmacon chojni que diconha?

Chojni judío vayeha na Jesús

²² Co ngain tiempo mé mero tiempoe quin, co ngain ciudad de Jerusalén chojni judío mero techonda na tti quiai para xaxaonxin na tti nchanho are joexin conchjian tti nihngo icha importante. ²³ Co are mé, Jesús tarridehe ngain nihngo mé ngain lugar que vinhi portal de Salomón.

²⁴ Co chojni judío vixindanji na Jesús co ndačo na ngain:

—¿Hasta tti quesá sinchenona ni ra jaha? Si jaha tti Cristo, ndačo ndacoa nao jaxon.

²⁵ Jesús ndačo ngain na:

—Janha ondačhjan co jaha ra vitticaonnaha ra. Cain cosa que janha nttaha, nttaha ixin Ndodana ttetonna. Co tti nttaha janha jamé xago claro quensen janha, ²⁶ pero jaha ra ditticaonha ra ixin jaha ra jaha colecona ra inchin ondattjo ra are saho. ²⁷ Colecona datsoan va ttana janha co janha chonxin jehe va co jehe va rroehna va. ²⁸ Janha rrochjaha va iná vida naroaxin que xonhi tiempo tsjexin co xonhi tiempo ndasitján va, ni xonhi chojni santsjenanxin va de ngá rana. ²⁹ Ndodana chjana Ndo va co jehe Ndo chonda Ndo joachaxin de cainxin cosa, co xonhi chojni santsjehe Ndo va de ngá rá Ndo. ³⁰ Janha co Ndodana jehó nacoa na.

³¹ Cottimeja chojni judío cjan na coá na x̃o para rroʒanguí na Jesús. ³² Co Jesús ndačho ngain na:

—Janha jointtaha tsje cosa jian ngattoxon con ra conixin joachaxín Ndodana; ¿quexehe de cain cosa jihi rinao ra rroʒanguinanxin ra x̃o?

³³ Jehe chojni judío ndačho na:

—Janha na rroʒanguiaha ra x̃o de ni ná cosa jian que jaha joinchehe; janha na rinaho na rroʒanguiaha ra x̃o ixin jaha chondaha respeto ngain Dios de ixin tti jaha ndačho. Jaha jehó ná xí, pero jaha rridoan Dios.

³⁴ Cottimeja Jesús ndačho ngain na:

—Ngain ley que chonda ra jitaxin que Dios ndačho: “Jaha ra dios ra.” ³⁵ Noa na que čhoča rrondačho na nahi de ixin tti ndačho ngain tti jitaxin Palabré Dios, co Dios joincheguinhí chojni dios, tti nivayé joajné jehe. ³⁶ Co si Dios joantsjenda na janha co rroanha na ngataha nontte nttihi, ¿quexén nchao ndačho ra que janha chondaha respeto ngain Dios ixin ndačhjan que janha Xenhe Dios? ³⁷ Si janha čhoča nttaha cain cosa que nchehe Ndodana, ditticaonha ni ra janha. ³⁸ Pero si janha ján nttaha, masqui ditticaonha ra nganji na, ditticaon ra ngain cosa que janha nttaha para que tsonoha ra que Ndodana jí Ndo nganji na co janha rrihi ngain jehe Ndo.

³⁹ Jehe na joinao na rrotse na Jesús iná, pero Jesús sacoiŋguehe na.

⁴⁰ Cottimeja Jesús sacjan para lado čhinxin nchanho de río Jordán co nttiha vittohe ngain tti lugar que vancheguittexin Juan chojni are icha

saho. ⁴¹ Tsje chojni cjoí na joitsjehe na Jesús co ndačo na:

—Ján ndoa, masqui Juan xonhi milagro joinchehe, pero cainxin tti jehe ndačo de ixin xí jihi ján ndoa.

⁴² Co tsje chojni vitticaon na Jesús ngain lugar mé.

11

Are ndavenhe Lázaro

¹ Vehe ná xí venihi que vinhi Lázaro, xí mé Betania rajné xa, xajehō rajné María co xanchó María xanMarta. ² Jehe María jihi, nchichó jehe Lázaro, tti venihi, co María jihi tti cointtjitte aceite que anto xajni ngataha rotté Jesús co joinchex-emanxin conixin xajá. ³ Jañá cayoi nchí mé rroanha ncha joajna ngain Jesús co ndačo ncha:

—Xiamigoa soixin nihi xa.

⁴ Are Jesús coinhi jihi, ndačo:

—Chin yá nasoenxinhao chin Lázaro, jehō para rrořagoxin joachaxín Dios co para de ixin chin yá cai rrořagoxin joachaxín Xenhe Dios.

⁵ Masqui Jesús anto joinao jehe Marta, conixin cayoi xanchó Marta, María co Lázaro, ⁶ are ndache na Jesús ixin Lázaro venihi, Jesús xa vittohe iyó nchanho nttiha ngain tti lugar que vehe. ⁷ Después ndačo ngain tti chojni que vacao:

—Chjin na iná para ngain Judea.

⁸ Co tti chojni que vacao ndačo na:

—Maestro, xa seha chojni judío que techonda joachaxin de ngain lugar mé joinao na narrogoenxon na jaha ixin xo, ¿co xa rinao tsji nttiha iná?

⁹ Jesús ndačo:

—¿Ajeha ndoa que nchanho chonda tteyó hora? Co si ná ni čji ni de nchanho, tonttenguixinha ni ixin dicon ni joadingasán que jí ngataha nontte jihi, ¹⁰ pero si ná ni čji ni de ttie, tonttenguixin ni ixin diconha ni joadingasán.

¹¹ Cottimeja ndačo Jesús ngain tti chojni que vacao:

—Xiamigoa na Lázaro tajjioa xa, pero sintaxingamá xa.

¹² Cottimeja tti chojni que vacao Jesús ndačo na:

—Soixin, si tajjioa, rročo orroxengañao.

¹³ Pero tti ndačo Jesús rročo que Lázaro ondavenhe. Co cain tti chojni que vacao Jesús xaxaon na que ndoa tti ndačo Jesús ixin tavejoa Lázaro. ¹⁴ Cottimeja Jesús ndačo ngain na claro:

—Lázaro ondavenhe. ¹⁵ Janha chahna ixin joar-
iha nttiha; icha jian jañá para ixin jaha ra sitticaon
ra. Pero chjin na sitsjehe na Lázaro.

¹⁶ Cottimeja Tomás, tti vancheguinhí na Xancoata, ndačo ngain tti icha chojni que vacao Jesús:

—Chjin na ján na cai para senhe na conixin Jesús.

Jesús ndačo ixin jehe tti rroxechonxin chojni co jehe tti danjo iná vida naroaxin

¹⁷ Are jehe na joiji na nttiha, chojni nttiha joinchenohe na Jesús que Lázaro ovechonda nó nchanho que jíxavá. ¹⁸ Rajna Betania vehe chiaon Jerusalén, inchin yoto kilómetro co rioho tecaouxin chó rajna mé. ¹⁹ Co tsje chojni judío joitsjehe jehe Marta co María para joantsjehe na joachjaon

ansén cayoi nchí mé de ixin xanchó ncha que ndavenhe. ²⁰ Are Marta conohe que Jesús ojoiji nttiha, jehe Marta vačhjexin de nchia co joichoexin Jesús ngatja nttiha, pero María ndavittohe ngaxinhi nchia. ²¹ Co Marta ndačo ngain Jesús:

—Si soixin rrogarihi nttihi, rroguenha xanchian. ²² Pero janha nona que Dios rrochjá cain tti sanchiehe.

²³ Jesús ndačo:

—Xanchó rrocjan xan sechon xan.

²⁴ Marta ndačo ngain Jesús:

—Ján, janha nona que rrocjan xan sechon xan are rroxechon cainxin nindadenhe ngain nchanho are ndatsjexin mundo.

²⁵ Cottimeja Jesús ndačo:

—Janha tti rroxechonxin cainxin chojni, co janha tti danjo iná vida naroaxin. Tti chojni que ditticaon na janha, masqui jehe senhe, pero rrochonda iná vida naroaxin. ²⁶ Co cainxin chojni que xa techon co ditticaon na, chojni mé xonhi tiempo sinchetján na almé na ixin ochonda na vida mé. ¿Aditticaon jaha jiji?

²⁷ Marta ndačo:

—Ján, janha ditticanho que soixin tti Cristo, tti Xenhe Dios, tti vandačo profeta que sihi ngataha nontte jiji.

Jesús tsjanga ngaca tti veřavá Lázaro

²⁸ Are Marta joexin ndačo jiji, cottimeja cjoijogayé María, jehe xanchó, co ndačo Marta jimao ngain María:

—Tti Maestro nttihi jí co dayaha jaha.

²⁹ Are María coinhi jihi, jehe jaicoa vingattjen co cjoí joitsjehe Jesús. ³⁰ Jesús xa joigaha rajna rato mé; ixin jehe xa vittohe ngain tti lugar vetanxin Marta. ³¹ Are ni icha vicon na que María jaicoa vingattjen co vačhje, tti chojni judío que te ntiha ngain nchiandoha María ixin tedantsjehe na joachjaon ansén, jehe na rroé na María ixin jehe na xaxaon na que María sarrocji ngain tti jiřavá xanchó para rrotsjangaxin ntiha.

³² Cottimeja María, are joiji tti jí Jesús, María vettoxin nttajochjihi ngaca rotté Jesús, co ndačo: —Si soixin rrogarihi ntihi, xanchian rroguenha xan.

³³ Are Jesús vicon que María jitsjanga co cain chojni judío que joicao María tetsjanga na cai, Jesús vechín co anto soji ná joachjaon conohe ngain ansén. ³⁴ Cottimeja Jesús joanchiangui co ndačo:

—¿Ttinó cjoavá ra Lázaro?

Co jehe na ndačo na:

—Xacoi soixin, sitsjehe.

³⁵ Co Jesús tsjanga. ³⁶ Cottimeja chojni judío ndačo na:

—Tsjenxin ra, anto joinao xí jihi Lázaro.

³⁷ Pero icanxin de jehe na ndačo na:

—Xí jihi tti chjé jmacon tti xí que vaguiconha, ¿co jai, ařonhi ná cosa nchao rrojinchehe xa para que Lázaro rroguenha?

Are xechon Lázaro

³⁸ Jesús cjan conohe iná joachjaon anto soji, co jehe conchienne ngain tti jiřavá Lázaro ngain ná cueva, co jijé ná řo tti dixinxin na. ³⁹ Jesús ndačo:

—Dinttjian ra x̄o.

Marta, n̄chichó jehe tti ndavenhe, ndačo n̄cha ngain Jesús:

—Pero puede atto x̄a ixin ochonda nó nchanho que ndavenhe.

⁴⁰ Pero Jesús ndačo:

—¿Andattjoha que si sitticaon nganji na janha, jaha sicon joachaxín Dios?

⁴¹ Cottimeja vinttjian na x̄o mé. Co Jesús tsjehe para ngain co ndačo:

—Padre soixin, chjaha gracias ixin coinhi tti janha ndačhjan. ⁴² Janha nona que cainxin tiempo ttinhi tti janha ndačhjan, pero jai janha rrindačhjan jihi para que chojni tehe sicon na que soixin ttinhi tti janha ndačhjan nganji, co para que sitticaon na que soixin rroanha na janha.

⁴³ Are joexin ndačo Jesús jihi, jehe ndačo s̄en:

—¡Lázaro, dačhjexin de yá!

⁴⁴ Co jehe tti ndavenhe mé vačhje. Ngoixin cuerpo e jisiandanji ná tira de manta que jičhiaxin de rá co de rotté, co ngá con jisía iná manta. Jesús ndačo:

—Tonxindanguhe ra co tančhanda ra satsji.

*Quex̄én x̄axaon na para rrotse na Jesús
(Mt. 26.1-5; Mr. 14.1-2; Lc. 22.1-2)*

⁴⁵ Conixin jihi, tsje chojni judío vitticaon na Jesús, tti nijoicao María co vicon na tti joinchehe Jesús. ⁴⁶ Pero icanxin de jehe na cjoí na ngain xifariseo joitsjehe na xa co coequín na xa tti joinchehe Jesús. ⁴⁷ Cottimeja tsje xifariseo, co tsje xidána que vaquetonha ngain icha xidána co cain

xí que vechonda joachaxin ngain juzgadoe nihngo xatte xa co vinttendačo xa:

—¿Quehe sinttoho na? Xí jiji atto tsje milagro jinchehe xa. ⁴⁸ Si tsančjanda na xa jañá, cainxin chojni sitticaon na jehe xa, co tsí autoridad romano co sinchexante ningoa na icha importante conixin nacioan na.

⁴⁹ Pero ná de jehe xa, que vinhi Caifás que jehe mé xidána icha importante tiempo mé, jehe mé ndačo ngain xa:

—Jaha ra xonhi noha ra, ⁵⁰ ¿anoaha ra que icha jian para ixin ján na que senhe jeho nacoaxinxon xí para ixin ngoixin nación, que rroxante ngoixin nación?

⁵¹ Pero Caifás ndačoha jiji por ixin jeho, pero ixin jehe vehe xidána icha importante tiempo mé, mexinxin Dios ndačo ngain jehe para que jehe ndačo jañá ixin Jesús ndasenhe para ixin ngoixin nación judía, ⁵² co jeha para ixin jeho nación mé, cai para ixin cainxin chojni que ditti-caon Dios ngoixin mundo sinchesayehe na jeho nacoaxinxon Dios. ⁵³ Co de ngain nchanho mé chojni judío que vechonda joachaxin ořaxaon na para nasoenxon na Jesús.

⁵⁴ Mexinxin Jesús ivaxagoha ni ivacjiha ngayé chojni judío, mexinxin jehe vačjexin de ngain regioen Judea co sacjoi ngain ná lugar chian ngagaha jna, ngain ná rajna que dinhi Efraín. Nttiha vittohe jehe conixin cain tti chojni que vacao.

⁵⁵ Tsjeha nchanho vitján para tti quiai que dinhi pascua para ixin chojni judío. Co mexinxin tsje chojni ngain tsje rajna sacjoi na para Jerusalén

para joicoroa na saho de quiai mé inchin costumbré jehe na. ⁵⁶ Saho de rroquintteguixinhi na nihngo jehe na cjoé na Jesús, co are ovinttexinhi na nihngo joanchianguihi chó ná na co iná na:

—¿Quehe xaxaon ra? ¿Atsí Jesús ngain quiai jihi ani nahi?

⁵⁷ Xifariseo co cain xidána que vaquetonha ngain icha xidána ocoetonha xa que ixin quexeho chojni nohe quettinó vehe Jesús, que rrondačo chojni mé para que nchao sitse xa Jesús co tsiaxinhi xa.

12

Ná nchí que coinga Jesús aceite (Mt. 26.6-13; Mr. 14.3-9)

¹ Incjaon nchanho saho de tti quiai dinhi pas-cua, Jesús cjoí ngain Betania, tti rajna vehe Lázaro, tti Jesús joinchexechon de ndavenhe. ² Co nttiha nindoha Lázaro joinchexjian na ná comida para ixin Jesús. Marta joanjo tti joine na co Lázaro vehe ngain mesa para joinecaño Jesús conixin tti chojni que vacao. ³ Cottimeja María joiaho inchin rioho litro de aceite diconchjian joxon ca que dinhi nardo, co aceite mé anto xajni co anto rentte, co María coinga aceite mé rotté Jesús. Cottimeja joinchexemanxin conixin xajá. Ngoixin ngaxinhi nchia concaxajni aceite mé. ⁴ Cottimeja nichja Judas Iscariote, xitsihi ná tti vinhi Simón. Judas mé ná de tti tteyó chojni que vacao Jesús co jehe mé tti joindačo para tse na Jesús. Co Judas mé ndačo:

⁵ —¿Quedonda cochjiha aceite jihi? Ixin rentte inchin tsjexin dacha ná tti nchehe xa ngoixin ná nano. Co nchao rrocjenguijnaxin na chojni noa.

⁶ Pero Judas ndačhoha jihi ixin jehe ndoa rro-jinchenihi chojni noa, jehe ndačo jańá ixin jehe chehe. Co ixin jehe vehe tesorero de tomí cain tti tteyó chojni que vacao Jesús, mexinxin jehe vaqué ttoha tomí que vaganjo na nttiha. ⁷ Mexinxin Jesús ndačo:

—Tančhjanda nčí jihi ixin jehe ncha ojoinchehe ncha jihi para ngain nchanho que janha rrořavá na. ⁸ Jaha ra cainxin tiempo sintte chojni noa ngayaha ra, pero janha cainxinha tiempo sarihi ngayaha ra.

Are xaxaon na para narrogoenxon na Lázaro

⁹ Tsje chojni judío conohe na ixin Jesús vehe ngain rajna Betania, co jehe na vinttecji na nttiha, pero jeoha Jesús joitsjehe na nttiha, cjoí na para joitsjehe na Lázaro cai, tti joinchexechon Jesús are ndavenhe. ¹⁰ Cottimeja canxion xidána que vaquetonha ngain icha xidána cjoao chó xa para quežén sinttenchehe xa para narrogoenxon xa Lázaro cai, ¹¹ ixin causexin jehe tsje chojni judío vačhjeyexin de ngain chojni xa para vitticaon na Jesús.

Are Jesús joigaha ciudad de Jerusalén

(Mt. 21.1-11; Mr. 11.1-11; Lc. 19.28-40)

¹² Tsje chojni odicji Jerusalén para tti quiai que dinhi pascua, co para ndoexin conohe na ixin Jesús siji ngain ciudad mé.

¹³ Mexinxin cončhinji na cajne co joichoexin na Jesús ngatja nttiha, co ndačo na soji:

—¡Gloria para ixin Dios! ¡Anto jian jehe tti joí conixin nombré Dios, co anto jian jehe tti Rey de chojni Israel!

¹⁴ Jesús vittja ná colochó co jehe vetaha va, inchin cho ngain tti jitaxin Palabré Dios:

¹⁵ Xaonha jaha, ciudad de Sión; tsjenxin que joí tti Rey de jaha jitaha ná colochó.

¹⁶ Ngain momento jiji cain chojni que vacao Jesús coinxinha na cosa jiji, pero después, are Jesús ndavenhe co xechon, cottimeja xaxaon na que cain jiji jitaxin de ixin Jesús, co jañá conhe.

¹⁷ Cain chojni que vintte ngain Jesús are jehe vayé Lázaro de ngain tti vejavá co joinchexechon are ndavenhe, cain chojni mé coequin na tti jehe na vicon na. ¹⁸ Mexinxin tsje chojni vachje na para joiguetanxin na Jesús ngatja nttiha ixin venohe na tti joinchehe Jesús ngain Lázaro. ¹⁹ Cottimeja xifariseo ndache chó xa:

—Tsjenxin ra, chojni ditticaonha na na ján na: cainxin na sattji na ngain jehe.

Canxion chojni griego cjoé na Jesús

²⁰ De ngayehe cainxin chojni que cjoí Jerusalén para joinchesayehe na quiai nttiha, vintte canxion chojni griego que cai vitticaon inchin chojni judío.

²¹ Chojni griego jiji conchienne na ngain Felipe, tti rajné Betsaida ngain Galilea, co joinchetsenhe na ñao ndacho na:

—Rinaho na que soixin tsjagohna ra Jesús ixin rinaho na rronichjá na.

²² Felipe joindache Andrés, co cayoi na joindache na Jesús. ²³ Cottimeja Jesús ndacho:

—Ojoí tiempo que janha, tti Xí que joixin de ngani, tsoyana. ²⁴ Janha rrindattjo ra ndoa que si ná noanchjan de trigo detsingaha ngataha jinche co ndadenha, jehe noanchjan mé xajeho nacoa noanchjan, pero si noanchjan mé ndasenhe, cjan soan anto tsje noanchjan iná. ²⁵ Tti chojni que anto rinao vidé, chojni mé ndasinchetján vida mé, pero tti chojni que rinaoha vidé ngain mundo jihi, chojni mé tsenchjinha vidé para ngain vida naroxin que xonhi tiempo tsjexin. ²⁶ Si chonja chojni rinao sinchehe xana janha, pero jehe chonda que sitticaon palabrana; co tti janha sar- ihi, nttiha sehe jehe cai. Tti chojni que sinchehe xana janha, Ndodana sinchesayehe Ndo chojni mé.

Jesús ndačo ixin jehe ndasenhe

²⁷ Janha jai atto soji joachjaon tonohé ansenna; ¿quehe rrondačjan janha? Janha rrondačjanha: “Padre, tančjandaha na janha ngain tti tsonna jai.” Ixin para mé joixin janha. ²⁸ Mexinxin janha rrondačjan: “Padre, nttatsanha ñao, nchehe de que cain chojni sinttasayaha.”

Cottimeja coinhi na tté Dios de ngajni que ndačo:

—Janha ojointtaha jamé, co xa sinttaha iná.

²⁹ Co canxion chojni que coinhi nttiha ndačo na que joatte, co icanxin na ndačo na:

—Ná ángel nichjé.

³⁰ Cottimeja Jesús ndačo ngain na:

—Tti jaha ra coinhi ra, yá para ixin jaha ra co nahi para ixin janha. ³¹ Jai joí nchanho que Dios sinchejuzgá mundo jihi, co jai Dios senguixin de

ngain mundo jiji tti ttetonha ngain mundo jai.
³² Co are chojni rrotsín na na janha noi nganito cruz, chojni de cain nación sinao na sitticaon na na janha.

³³ Jesús ndačo jiji para que coinxin jehe na queñén senxin jehe. ³⁴ Co chojni ndačo na ngain Jesús:

—Janha na coian tti jitaxin ley que Cristo, tti Dios rrorroanha, chonda que sechon para cainxin tiempo. ¿Queñén ndačoxin jaha que tti Xí que joixin de ngajni chonda que rrotsín na noi nganito cruz? ¿Quensen yá tti Xí que joixin de ngajni?

³⁵ Cottimeja Jesús ndačo ngain na:

—Jai que janha xa rrihi ngayaha jaha ra rročo que xa chonda ra joadingasán jiji, pero jeho para nchion tiempo. Dacji ra jaxon que xa chonda ra joadingasán jiji para que sinttañaonha ra tti naxin xehe ixin tti chojni que čhji ngain tti naxin xehe noeha na ttinó rridintte na. ³⁶ Ditticaon ni ra janha que janha inchin tti joadingasán jaxon que janha rrihi nganji ra, para que sintte ra chojni joadingasán.

Co are joexin ndačo Jesús cosa jiji, jehe sacjoi co tavemehe na.

Quedonda chojni judío vaguitticaonha na Jesús

³⁷ Masqui Jesús joinchehe anto tsje milagro, co masqui joinchehe milagro mé ngattoxon con jehe na, jehe na vaguitticaonha na jehe ³⁸ ixin chonda que joiconhe jamé ixin profeta Isaías dicjin janhi: ¿Quensen vitticaon joajnana na?

¿Quensen vicon tti joachaxin jie que chonda Dios?

³⁹ Jañá mexinxin čhoha vitticaon na, co cai dicjin Isaías janhi:

⁴⁰ Dios joinchechjian jehe na de chejo na ngain joarrixaon na co de cha ansén na, para que siconxinha na conixin joarrixaon na, ni tsinxinha na jian de ixin cosa jihi, ni tsiha na nganji na para que janha sinttaxingamá na.

⁴¹ Isaías ndačo cain jihi ixin jehe vicon anto tsje joachaxin que Jesús chonda, co mexinxin jehe vanichja jañá de ixin Jesús.

⁴² Masqui jañá jitaxin, pero tsje chojni judío vitticaon na Jesús hasta icanxin de jehe na tti ni icha vaquetonha. Pero jehe na vandacheha na icha chojni ixin vitticaon na Jesús ixin vařaon na que xifariseo senguixin na xa de ngain nihngo. ⁴³ Jehe na icha joinao na tti jian que nichja chojni de ixin jehe na pero řaxaonha na de queřén sinchehe na para que Dios rrořaxaon jian de ixin jehe na.

Palabré Jesús sinchejuzgá ngain chojni

⁴⁴ Jesús nichja sén co ndačo:

—Tti chojni que ditticaon na janha, jeoha nganji na ditticaon, cai ditticaon ngain Ndodana que rroanha na. ⁴⁵ Co tti chojni que dicon na janha, cai chojni mé inchin jehe rroguicon tti rroanha na janha. ⁴⁶ Janha que inchin tti joadingasán joihi ngataha nontte para que cain chojni que ditticaon na janha sittoeha na ngain tti naxin xehe. ⁴⁷ Pero si canxion na ttinhi na palabrana co ncheha na caso, jeha janha tti sinttacastigá na ixin janha joiha para sinttacastigá chojni ngain mundo jihi; janha joihi para que tsjenguijna na para que

rrochondaha na castigo de cain cosa jianha que nchehe na. ⁴⁸ Are ndatsjexin mundo tti ndoa que janha ndačhjan, mé tti sinchecastigá tti chojni que rinaoha na janha co ncheha caso palabrana. ⁴⁹ Jamé ixin janha nichjaha inchin janho rinaho; Nnodana que rroanha na, Ndo mé Ndo ttetonna tti janha rrondačhjan co tti janha tsjagoa chojni. ⁵⁰ Co nona que tti ttetonha Nnodana, mé para vida naroaxin que xonhi tiempo tsjexin. Jañá mexinxin tti janha ndačhjan, ndačhjan inchin Nnodana coetonna.

13

Jesús joinchetsinda rotté cain chojni que vacao

¹ Ná nchanho saho de tti quiai dinhi pascua Jesús ovenohe que ojitonchian tiempo que jehe satsjixin de ngataha nontte nttihi co satsji para ngain Nnodé. Jehe cainxin tiempo joinao chojni jehe nttihi ngataha nontte, co nchanho mé jehe cjoagoe na que jehe anto rinao na.

²⁻⁴ Inchínji joincheŋaxaon Judas Iscariote, xit-sihi ná tti vinhi Simón, para que jehe xaxaon quexén sinchehe para sicjagoe chojni que ninga-conhe Jesús ttinó jí Jesús para rrotse na. Jesús ovenohe que jehe joixin de ngain Dios, co ixin rrocjan satsji ngain Dios iná, co venohe que jehe Nnodé joanjo Ndo cainxin joachaxin; mexinxin are tejine na, Jesús vingattjen de ngain mesa, co joantsje lonttoe jingá, tti lontto jidattexin co coiaxin nttachajnoe conixin ná toalla. ⁵ Cottimeja coequia jinda ná chiavandejachjan co coexinhi joinchetsinda rotté cain chojni que vacao jehe, co

joinchexemanxin rotté na conixin tti toalla que jidicaxin ngain nttachajnoe.

⁶ Co are jehe coexinhi joinchetsinda rotté Simón Pedro, jehe jihi ndačo:

—¿Asoixin sinchetsinda rottena?

⁷ Jesús ndačo:

—Jai jaha ttinxinha tti rrinttaha janha, pero después jaha tsinxin.

⁸ Pero Pedro ndačo ngain:

—Janha xonhi tiempo rochjaha joachaxin para sinchetsinda rottena.

Jesús ndačo ngain:

—Si janha sinttatsindaha rottea, jaha jeha chojnina.

⁹ Simón Pedro ndačo:

—Jeoha rottena sinchetsinda na remé; cai sinchetsinda rana co jana.

¹⁰ Pero Jesús ndačo ngain:

—Tti chojni que nandá ditsinda irrogondaha rrotsinda icha, jeha rotté ixin ngoixin cuerpoe oroa. Jaha ra oroa ansean ra masqui jeha cainxin ra.

¹¹ Jehe ndačo: “Jeha cainxin ra roa ra”, ixin jehe ovenohe quexehe tti rrondache chojni quexén para rrotse na Jesús.

¹² Are joexin joinchetsinda rotté cain na, jehe cjan vengá lonttoe, tti lontto jidattexin, co tavehe ngain mesa iná co ndačo ngain na:

—¿Attinxin jaha ra tti jointtaha janha nganji ra?

¹³ Jaha ra ncheguini ni ra janha Maestro co tti chonda cain joachaxin para ixin jaha ra, co nchao ndačo ra jañá ixin janha ndoa jañá na. ¹⁴ Janha Maestro na co chonda joachaxin para ixin jaha

ra, pero masqui jamé janha jointtatsinda rottea ra, mexinxin cai jaha ra xaxaonha ra ixin anto importante ra; chonda ra que sinchetsindehe chó rottea ra naná ra. ¹⁵ Janha jointtaha jihi para ch-jaha jaha ra ná ejemplo para que jaha ra sinchehe ra xajeho tti janha jointtaha. ¹⁶ Janha rrindattjo ra ndoa que ni ná tti nchehe xa choha rrochonda icha joachaxin que xinajní, co ni ná tti dicao ná joajna choha rrochonda icha joachaxin que jehe tti rroanha joajna mé. ¹⁷ Si ttinxin ra cosa jihi, co jañá sinchehe ra, jaha ra atto chjoin sintte ra.

¹⁸ 'Janha rrinichjaha de cainxin jaha ra ixin janha nona quecá ra xo coinchiaha ra. Pero chonda que tsonhe inchin jitaxin Palabré Dios: "Tti chojni que jinequina, mé tti rroningaconna." ¹⁹ Janha ndattjo jaha ra jihi jai para que are siconhe, jaha ra sitticaon ni ra janha que janha ndoa tti Cristo na inchin ndachjan. ²⁰ Janha rrindattjo ra ndoa que tti chojni que sayé quexeho chojni que janha rrorroanha, cai chojni mé sayé na janha; co tti chojni que sayé na janha, cai sayé na tti rroanha na.

Jesús ndačo ixin Judas tsjago quexén rrotse na Jesús

(Mt. 26.20-25; Mr. 14.17-21; Lc. 22.21-23)

²¹ Are joexin ndačo Jesús jihi, jehe conohe ngain ansén ná joachjaon anto soji, co ndačo claro:

—Janha rrindattjo ra ndoa que ná de jaha ra tti rrondache chojni quexén para rrotse na na janha.

²² Cottimeja cain chojni que vacao Jesús coex-inhi na tsjehe chó na pero noeha na quexehe de

jehe na tti ndačo Jesús. ²³ Ná de tti tteýo chojni que vacao Jesús, tti Jesús anto joinao, jehe mé tajine ngaca Jesús, ²⁴ co Simón Pedro joinchehe seña ngain mé para que jehe mé sanchiangui ngain Jesús de ixin quensen tti ndačo Jesús. ²⁵ Cottimeja jehe mé icha conchienne ngain Jesús para joanchiangui co ndačo:

—Ndachjenji na soixin quensen mé.

²⁶ Jesús ndačo:

—Janha sinttatjao rioho niottja, co tti rochjaha nio, jehe mé.

Jamé, joinchetjao rioho niottja co joanjo nio ngain Judas Iscariote, tti xitsihi ná tti vinhi Simón.

²⁷ Co are vayé Judas niottja mé, inchínji joixinhi ngain ansén. Cottimeja Jesús ndačo ngain:

—Tti sinchehe, jaicoa nchehe.

²⁸ Pero ni ná de tti nitejine ngain mesa n-tiha coinxinha na ixin quedonda ndačo Jesús yá ngain Judas. ²⁹ Judas tti vehe tesoreroe tti chojni que vacao Jesús, mexinxin canxion na xaxaon na que Jesús ndache yá para que Judas rroquehna čhoan cosa que rrogonda para ngain quiai, o rroganjo nchin tomi ngain chojni noa. ³⁰ Are joexin vayé Judas niottja mé, jehe vačhjexin de nttiha. Co rato mé ottie.

Cosa naroaxin que Jesús coetonha

³¹ Are Judas ovačhje, Jesús ndačo:

—Jai rrožago tti joachaxin que chonda janha, tti Xí que joixin de ngajni, co joachaxín Dios rrožagoxin de nganji na, ³² ixin si janha, tti Xí que joixin de ngajni, tjago joachaxín Dios, cai Dios tsjago que janha chonda joachaxin, co jehe

otoin sinchehe. ³³ Jaha ra inchin xannchinnch-inchjanhna co janha ndattjo ra ixin isariha tsje tiempo nganji ra. Jaha ra tsjé ni ra, pero xajeho inchin ndattjan chojni judío rrondattjo jaha ra jai: Jaha ra čhoha tsji ra tti satsji janha. ³⁴ Janha rritetonha jaha ra ná cosa naroaxin jihi: rinao chó ra. Janhi inchin janha rinaho jaha ra, jaha ra chonda ra que sinao chó ra. ³⁵ Si sinao chó ra, cainxin chojni ngoixin nontte tsonohe na que jaha ra ndoa ditticaon ni ra janha.

Jesús ndačo que Pedro rrondačo ixin jehe chonxinha Jesús

(Mt. 26.31-35; Mr. 14.27-31; Lc. 22.31-34)

³⁶ Simón Pedro joanchianguihi Jesús co ndačo:

—¿Quettinó satsji soixin?

Co Jesús ndačo ngain:

—Tti janha satsji, jaha ičhoha rrorroehna jai, pero rrorroehna después.

³⁷ Cottimeja ndačo Pedro ngain:

—¿Quedonda čhoha rrorroaha soixin jai? Janha nchao sanjo vidana para ixin soixin.

³⁸ Jesús ndačo ngain:

—¿Aco ndoa jaha sanjo vidá para ixin janha? Janha rrindattjo ndoa que saho de rrotsje conttaxichia, jaha orrondačo ninxin nttiha que chonxinha na janha.

14

Jesús ndačo ixin jehe tti nttiha para ngain Ndoé

¹ Taha ra joachjaon. Ditticaon ra ngain Dios co ditticaon ni ra janha cai. ² Ngain lugar tti jí Ndo-dana jí tsje lugar para sintte ni. Co si rrocjiha jamé, janha orrondattjo ra. Mexinxin janha tsji para siguinchiá ná lugar tti sintte ra. ³ Co are onchao sehe cain cosa, janha sihi iná para sirroaha ra co satsjin na nttiha para que sintte ra xajeho lugar tti janha sarihi. ⁴ Jaha ra chonxin ra ttinó satsji janha co cai ochonxin ra quexehe nttiha.

⁵ Tomás ndačo ngain Jesús:

—Chonxinha na quettinó satsji soixin, mexinxin ¿quexén rrochonxinxin na nttiha?

⁶ Jesús ndačo ngain:

—Janha tti nttiha na, co janha tti tjago tti ndoa, co janha tti danjo iná vida naroaxin. Jeho de ixin janha nchao sijixin cain chojni ngain Ndodana.

⁷ Si jaha ra ochonxin ni ra janha, cai ochonxin ra Ndodana. Co ochonxin ra Ndo desde jai ixin jaha ra ovicon ra Ndo.

⁸ Cottimeja Felipe ndačo ngain Jesús:

—Chjana ra joachaxin sicon na Ndodá na; conixin maho janha na anto rrochahna na.

⁹ Jesús ndačo ngain:

—Felipe, ochonda anto tsje tiempo que janha rrihi nganji ra, ¿aco xa chonxinha na? Tti chojni que dicon na janha, cai jehe dicon Ndodana. ¿Quedonda ndachjenji na ixin rrochjaha joachaxin para sicon Ndodá na? ¹⁰ ¿Aditticaonha que janha rrihi ngain Ndodá na co jehe Ndo jí Ndo nganji na? Cain cosa que rrindattjo ra, rrindattjoha ra inchin janho rinaho; Ndodana que jí nganji, jehe Ndo nchehe Ndo tti jehe Ndo rinao Ndo. ¹¹ Ditticaon ni ra que janha rrihi ngain Ndodana co jehe Ndo

jí Ndo nganji na, pero si nahi, jeho ditticaon ni ra ixin janha nttaha tsje cosa jian. ¹² Janha rrindattjo ra ndoa que tti chojni que ditticaon nganji na janha, cai sinchehe cain cosa que janha nttaha, co sinchehe cosa icha jian ixin janha satsji tti jí Ndodana. ¹³ Co cain tti joatotsenhe ñao ra que jaha ra sanchia ra conixin joachaxín nombrena, janha rrochjaha ra para que Ndodana tsosayehe Ndo de ixin janha tti Xenhe Ndo. ¹⁴ Janha sinttaha quexeho cosa que jaha ra sanchia ra conixin joachaxín nombrena.

Jesús ndaĉho ixin jehে rrorroanha Espírítu Santo

¹⁵ 'Si jaha ra rinao ni ra janha, ditticaon ra tti janha rritetonha ra. ¹⁶ Co janha sinttatsán ñao Ndodana que rrorroanha ra Ndo iná tti tsjen-guijna ra co sehe para cainxin tiempo nganji ra: ¹⁷ mé tti Espírítu Santo que tsjagoaha ra tti ndoa de ixin Dios. Tti chojni que icha ncheĉoxinhi cosa de ngataha nontte jihi, chojni mé ĉoha sayé Espírítu jihi ixin ni diconha na co ni chonxinha na de ixin Espírítu jihi. Pero jaha ra chonxin ra de ixin Espírítu jihi ixin jehে Espírítu jihi jí nganji ra, co sittohe ngaxinhi jaha ra para cainxin tiempo. ¹⁸ Janha tsinttoaha ra jaho ra, rrocjan na para sarihi nganji ra. ¹⁹ Iseha para que cain chojni isiconha na na janha, pero jaha ra sicon ni ra janha. Co jaha ra sinttechon ra ixin janha rrichon. ²⁰ Ngain nchanho mé jaha ra tsonoha ra que janha rrihi ngain Ndodana, co jaha ra te ra nganji janha, co janha rrihi nganji ra. ²¹ Tti chojni que nohe co ditticaon tti janha ttetonha, jehে tjago que ndoa rinao na. Co Ndodana sinao Ndo tti chojni que

sinao na janha, co cai janha sinaho jehe na co rrořago na ngain na.

²² Iná Judas, jeha tti Iscariote, jehe mé ndařho:

—¿Quedonda rrořago nganji janha na co nahi ngain chojni que icha ncheřoxinhi cosa de ngataha nontte?

²³ Jesús ndařho ngain:

—Tti chojni que rinao na janha, jehe nchehe caso tti ndařhjan janha, co Ndodana sinao Ndo jehe, co Ndodana co janha sihi na sintte na ngain jehe chojni mé. ²⁴ Tti chojni que rinaoha na janha, jehe ncheha caso tti janha ndařhjan. Tti joajna que jaha ra tettinhi ra jeha joajnana janha, mé joajné Ndodana que rroanha na.

²⁵ Janha rrindattjo ra cain jiji jaxon que řa rrihi nganji ra, ²⁶ pero janha rrondattjan Ndodana co jehe Ndo rrorroanha Ndo Espíritu Santo para que tsjenguijna jaha ra co santsjaha ra joachjaon. Jehe mé tti tsjagoha ra cain tti ndoa, co sinttařaxaon ra cainxin tti janha ndattjo ra.

²⁷ Jai que chiaon tiempo para janha satsjixin de nganji jaha ra, janha danjo nganji ra tti řhjoin que tsonohe ansean ra. Pero mé jeha inchin tonohé ansén chojni que ncheřoxinhi cosa jianha de ngataha mundo jiji. Mexinxin taha ra joachjaon ni řaonha ra. ²⁸ Jaha ra ocoinna ra tti ndařhjan que janha satsji, co rrocjan na sihi para sarihi nganji ra iná. Si ndoa rinao ni ra, chonda que chaha ra are conoha ra que janha satsji ngain Ndo-dana ixin jehe Ndo chonda Ndo icha joachxin que janha. ²⁹ Janha rrindattjo ra jiji jaxon para que are siconhe, cottimeja sitticaon ra.

³⁰ 'Irronichjaha icha nganji ra ixin ojoí tti ttonhe cain chojni que icha ncheřoxinhi cosa de ngataha nontte jihi. Masqui jehe chondaha ni ná joachaxin para ixin janha. ³¹ Pero tti tsonhe jihi chonda que tsonhe para que chojni ngoixin mundo tsonohe na que janha rinaho Ndodana co janha nttaha cainxin tti jehe Ndo coetonna Ndo. Dingattjen ra co sachjinxin na de nttihi.

15

Jesús inchin nttauva

¹ 'Janha inchin tti mero maté nttauva, co Ndodana inchin tti jinda nttá. ² Cainxin chojni que ditticaon na janha, jehe inchin rama que danjo ttochjoin. Pero tti chojni que ncheha inchin rinao Ndodana, chojni mé inchin tti rama que danjoha ttochjoin. Mexinxin Ndodana dantsjenda Ndo chojni mé inchin nchehe tti jinda nttauva tončhinji rama que danjoha ttochjoin. Pero cain chojnina que nchehe inchin rinao Ndodana, jehe Ndo dinttjian Ndo cain cosa jianha de ngain chojni mé inchin nchehe tti jinda nttauva damehe co ncheroa cain rama que danjo ttochjoin para que sanjo rama mé icha ttochjoin. ³ Jaha ra oroa ra de ixin tti janha jointtacoanha ra. ⁴ Cainxin ra dintte ra nganji na inchin janha rrihi nganji jaha ra. řajeho inchin ná ramé nttá čhoha sinchechjian rama mé ttochjoin si jehe rama mé jítsexinha ngain mero nttá jieto, jamé jaha ra cai čhoha sitticaon ra tti janha ttetonha ra si jaha ra sintteha ra nganji na.

⁵ 'Janha tti nttattochjoin na, co jaha ra rama ra. Tti sehe nganji janha co janha sarihi ngain jehe, jehe sanjo atto tsje ttochjoin, pero jaha ra xonhi sinchehe ra si janha coha na nganji ra. ⁶ Tti seha nganji na, mé inchin cain nttarama xonhi xé que dinttji co ndaxema. Co ttjejo na rama mé co tsjaga na ngain xohi.

⁷ 'Si jaha ra sinchehe ra sigue sintte ra nganji na, co rrotjañaha ra tti janha jointtacoanha ra, danchia ra tti sinao ra, co sayehe ra. ⁸ Ndodana tsoyayehe Ndo are jaha ra sinchehe ra jian co mé inchin tti anto tsje ttochjoin que sanjo ra, co jañá sintte ra chojni que ndoa ditticaon na janha. ⁹ Janha rinaho jaha ra, jañá inchin Ndodana rinao na janha; jañá nchehe ra sigue cosa jian para que janha sinaho ra. ¹⁰ Si ditticaon ra tti janha ttetonha ra, janha sinttaha sigue sinaho ra, jañá inchin janha ditticanho tti ttetonna Ndodana co jehe Ndo nchehe Ndo sigue rinao na Ndo.

¹¹ 'Janha nichja nganji ra jañá para que rrochaha ra jaha ra inchin janha chahna co jañá cainxin ra anto rrochaha ra. ¹² Tti janha ttetonha ra janhi sinchehe ra: que sinao chó ra inchin janha rinaho jaha ra. ¹³ xonhi iná cosa icha jie sinchehe ni para tsjagoxin ni que ndoa rinao chó ni. Jeho hasta jehe ni sanjo ni cuerpoe ni para ndasenhe para ixin xiamigoe ni. ¹⁴ Jaha ra tti xiamigona si sinchehe ra sigue ngain tti janha ttetonha ra. ¹⁵ Isinttaguinha ra ninchehe xana ixin tti nchehe xa noeha quehe nchehe xinajní. Jaha ra ntaguinhi ra amigona ixin jointtagatsoan ra cainxin tti ndachjenji na Ndodana. ¹⁶ Jeha

jaha ra coinchienea ni ra janha, sino que janha tti coinchiaha jaha ra, co coetonha ra que tti ra co ndache ra tsje chojni palabrana, co cain chojni que sitticaon palabrana, mé tti tsje ttochjoin que jaha ra sanjo ra, co cain ttochjoin mé tsonchjenhe tto. Co jamé Nnodana rrochjá ra Ndo cain tti sanchiehe ra Ndo conixin joachaxín nombrena. ¹⁷ Janha rritetonha ra que nchehe ra sigue rinao chó ra.

Chojni ningaconhe na Jesús conixin chojni jehe

¹⁸ 'Si chojni que icha ncheçoxinhi cosa de ngataha nontte rroningaconha jaha ra, noha ra que janha tti saho joiningaconna na. ¹⁹ Si jaha ra rrocji ra inchin jehe na co rrojinttaçoxinha ra cosa inchin jehe na ncheçoxinhi na, jehe nimé rrojinao ra na inchin jehe na rinao na chojni na. Pero janha coinchiaha jaha ra de ngayé chojni mé, co mexinxin chojni mé ningaconha ra na ixin jaha ra incheha ra inchin jehe na. ²⁰ çaxaon ra janha ndattjo ra: "Ni ná tti nchehe ça çoha chonda icha joachaxin que xinajní." Si janha ningaconna tsje chojni, cai jaha ra rroningaconha ra na. Co si jehe na vitticaon na tti janha jointtacoán na, cai sitticaon na tti jaha ra sinchecoenehe ra na. ²¹ Cain jihi sinchehe na nganji ra ixin causananxin janha ixin jehe na chonxinha na de ixin tti rroanha na janha.

²² 'Si janha rrojiha rronichjá na, jehe na rrogu-inttecaha na cosa jianha que nchehe na. Pero jai jehe na teca na cainxin tti jianha que nchehe na, ²³ ixin tti chojni que ningaconna, cai ningaconhe

na Ndodana. ²⁴ Si janha xonhi tiempo rrojintaha ngayé na lo que ni iná chojni choha nchehe, jehe na rroguinttecaha na cosa jianha que nchehe na. Pero jehe na ovicon na cain cosa jiji, co masqui jointtaha cain jiji, jehe na ningaonna na co ningaconhe na Ndodana cai. ²⁵ Pero jiji conhe ixin chonda que conhe palabra que jitaxin ngain ley que jehe na chonda na. Co ley jitaxin janhi: “Jehe na joiningaonna na co janha xonhi jianha jointtaha.”

²⁶ 'Pero tsí tti ttjenguijna ni. Co jehe mé tti Espíritu Santo que joixin de ngain Ndodana co jehe mé tti janha rrorroanha nganji ra. Co jehe Espíritu mé nichja joxon cosa ndoa co jehe rronichja de ixin janha. ²⁷ Co cai jaha ra rronichja ra de ixin janha ixin vintte ra nganji na desde are nacoexianxon ndattjan chojni de ixin quehe rinao Ndodana.

16

¹ Janha rrindattjo ra cain cosa jiji para que are anto tangui tsonha ra, jaha ra tsinttoeha ra de sitticaon ni ra. ² Jehe na senguixin ra na de ngain nihngo. Co sinqué momento de que quexeho de jehe na nasoenxon ra na co jehe na rroxaxaon na que jamé jiquininxin para ixin Dios. ³ Jehe jiji sinchehe na ixin jehe na xonhi tiempo ditticaon na ni Ndodana ni janha. ⁴ Janha rrindattjo ra cain jiji para que are tsí rato mé, jaha ra rroxaxaon ra que janha ondattjo ra.

Tti nchehe Espíritu Santo

'Janha ndattjoha ra cain jiji desde are saho ixin janha joarihi nganji ra. ⁵ Pero jai janha satsji

sigarihi ngain tti rroanha na, co ni ná de jaha ra tedanchianguinaha ra ixin ttinó satsji. ⁶ Puede ixin anto vinttechinhi ra ixin ndattjo ra cain cosa jihi. ⁷ Pero rrindattjo ra ndoa que icha jian para ixin jaha ra janha satsji. Ixin si janha satsjiha, tsiha Espíritu Santo para sehe nganji ra, mé tti tsjenguijna ra co santsjehe joachjaon ansean ra. Pero si janha satsji, janha rrorroanha jehe mé. ⁸ Are jehe tsí, jehe sincheguitticaon chojni de ngataha nontte jihi que jehe na nchehe na jianha, co jehe sinchenohe chojni ixin jehe na chonda que sinchehe na jian, co jehe sinchenohe na que ixin Dios sinchejuzguehe na. ⁹ Jehe sincheguitticaon na que nchehe na jianha ixin ditticaonha na na janha. ¹⁰ Jehe sinchenohe na ixin chonda na que sinchehe na jian ixin janha satsji tti jí Ndodana, co jaha ra isiconha ni ra. ¹¹ Co jehe sinchenohe na ixin Dios sinchejuzguehe na ixin ogoan conde-nado tti ttetonha ngain cain cosa jianha de mundo jihi.

¹² Janha chonda atto tsje que rinaho rrondattjo ra, pero jaha ra čoha tsinxin ra jai. ¹³ Are tsí Espíritu Santo, tti nichja ndoa, jehe tsjagoha ra cainxin tti ndoa ixin jehe rronichjaha inchin jeho rinao, jehe rrondačo cainxin tti jehe ttinhi ngain Ndodana, co jehe sinttanoha ra cosa que siconhe. ¹⁴ Jehe sinchesayana janha ixin jehe sayé tti ndoa de ixin janha co jehe sinttagatsoan ra. ¹⁵ Cainxin tti chonda Ndodana cai para ixin janha, mexinxin janha ndačhjan que Espíritu Santo sayé tti ndoa de ixin janha co jehe sinttagatsoan ra.

Jesús ndačo ixin jehe na tsa na joachjaon pero

seha

¹⁶ 'Iseha, jaha ra isiconha ni ra, pero nchion icha después jaha ra rrocjan ra sicon ni ra. Co después janha satsji tti jí Ndodana.

¹⁷ Cottimeja canxion de tti chojni que vacao Jesús joanchianguihi chó na co ndačo na:

—¿Quehe rročo jiji? Jehe ndattjo na que iseha ján na isoconha na jehe, co nchion icha después rrocjan socon na jehe iná, co ixin después jehe satsji tti jí Ndodé. ¹⁸ ¿Quehe rročo yá “iseha”? Ján na ttinxinha na quehe rročo tti jehe ndačo.

¹⁹ Jesús conohe que jehe na rinao na sanchiangui na ngain jehe, co jehe ndačo ngain na:

—Janha ndattjo ra que iseha jaha ra isiconha ni ra, co nchion icha después jaha ra rrocjan ra sicon ni ra iná. ¿Ajehe jiji tti tedanchianguihi chó ra? ²⁰ Janha rrindattjo ra ndoa que jaha ra rrotsjanga ra co sinttechinhi ra, pero chojni de ngataha nontte que ditticaonha na janha, jehe nimé rroché na. Pero masqui jamé, co masqui jaha ra sinttechinhi ra, pero jaha ra rrocjan rrochaha ra iná. ²¹ Are ná nchí sincheconcjiji xenhe, jehe ncha ta ncha joachjaon ixin ojoí hora de que anto tsín ncha, pero are ojoexin toncjiji xenhe ncha, ni ixaxaonha ncha de ixin anto coín ncha ixin anto ché ncha ixin joincheconcjiji ncha ná chjan.

²² Jañá jaha ra cai, ta ra joachjaon jai, pero janha rrocjan na sicon ni ra, cottimeja ansean ra anto rroché co ixonhi iná chojni nchao santsjaha ra tti rroché ansean ra.

²³ 'Ngain nchanho mé ixonhi joatotsenhe ñao saqué ra nganji na. Janha rrindattjo ra ndoa que Ndodana rrochjá ra Ndo cainxin tti jaha ra

sanchiehe ra Ndo conixin joachaxín nombrena. ²⁴Hasta jaxon jaha ra xa xonhi danchia ra conixin joachaxín nombrena; danchia ra co sayehe ra para que anto roché ansean ra.

Jesucristo coixinhi ngain cain cosa jianha de ngataha nontte

²⁵Janha ndattjo ra cain cosa jihi conixin ejemplo, pero tsí hora que janha irroundattjoha ra conixin ejemplo, janha rroundattjo ra claro de ixin Ndodana. ²⁶Ngain nchanho mé jaha ra sinchet-senhe ra ñao Ndo conixin joachaxín nombrena, co janha rrindačhjanha ixin janha tti sinttatsán ñao Ndo para ixin jaha ra ²⁷ixin jehe Ndo mero rinao ra Ndo. Jehe Ndo rinao ra Ndo ixin jaha ra rinao ni ra janha, co ditticaon ra ixin janha joixin de ngain jehe Ndo. ²⁸Janha vačhjexin de ngattoxon con jehe Ndo para que janha joihi ngataha nontte jihi, pero jai tsinttoa nontte jihi para sarrocjan na ngain Ndo.

²⁹Cottimeja cain chojni que vacao Jesús ndačho na:

—Janché, soixin rrinichja claro, co irrinchegondaha ni ná ejemplo. ³⁰Janché, ttianxin na que soixin noha cainxin cosa, co rrogondaha para iná chojni sanchiangui nganji soixin ixin soixin chonxin quehe rronichja ni icha saho que jehe ni rronichja ni. De ixin jihi janha na ditticanho na que soixin joixin de ngain Dios.

³¹Jesús ndačho ngain na:

—Jai ditticaon ra. ³²Jai ojoí tiempo co xajeho jai jaha ra rrochjequehe ra. Co satsji ra tti jaha ra sinao ra, co tsinttona ra janho. Pero jaonha

rrihi ixin jehe Ndo ttjen Ndo nganji na. ³³ Janha rrindattjo ra cain jihi para que chjoin tsonohe ansean ra ixin te ra nganji na. Ngataha nontte jihi chonda que anto tangui tsonha ra, pero x̄aonha ra ixin janha coixinna ngain cainxin cosa de ngataha nontte jihi.

17

Jesús joinchetsenhe ñao Dios para ixin chojni que ditticaon

¹ Are joexin ndačho Jesús cain cosa jihi, jehe tsjehe para ngajni co ndačho:

—Padre, horana ojoí hora. Nchesayehe Xanha para que jehe Xan cai sinttasayaha Xan soixin.

² Soixin chjehe Xanha joachaxin para ngain cain chojni, para que jehe Xan joanjo Xan iná vida naroaxin ngain tti chojni que soixin joanjo ngain Xan. ³ Co vida mé rročho que jehe na rrochonxin na de ixin soixin, tti nacoaxinxon Dios ndoa, conixin Jesucristo, tti soixin rroanha.

⁴ 'Janha jointtasayaha soixin nttihi ngataha nontte, co ojoena jointtaha tti soixin coetonna.

⁵ Co jai soixin nchesayana ngattoxon con soixin x̄ajeho inchin joinchesayana icha saho de que nontte vehe.

⁶ 'Tti chojni que soixin coinchiehe de ngayehe icha chojni ngataha nontte para chjana na janha, janha jointtanoa na quensen soixin. Chojni mé chojnia soixin, co soixin chjana na janha, co jehe na vitticaon na joajná soixin. ⁷ Co jai jehe na nohe na que cainxin tti chjana soixin joixin de nganji soixin. ⁸ Janha chjaha na tti joajna que soixin chjana, co jehe na vayé na joajna mé. Jehe na

conohe na ndoa que janha joixin de nganji soixin, co vitticaon na que soixin rroanha na.

⁹Janha nttatsanha ñao para ixin jehe na; janha jeha nttatsanha ñao para ixin tti chojni que icha ncheᵑoxinhi cosa de ngataha nontte, janha nttatsanha ñao para ixin tti chojni que soixin chjana ixin chojni mé chojnia soixin. ¹⁰Cainxin chojni que janha chonda, mé chojnia soixin, co cain chojni que soixin chonda, mé chojnina, co joachaxinna tononxin de ngain jehe na.

¹¹Janha isittonaha nttihi ngataha nontte ixin janha sasaso para sarihi nganji soixin, pero jehe na sittohe na nttihi ngataha nontte. Soixin que anto jian, darinda conixin joachaxian tti chojni que soixin chjana na para que jehe na ngoixin tiempo sintte na unido inchin soixin co janha.

¹²Are janha joarihi ngain jehe na ngataha nontte jihi, janha joarinda cain tti chojni que soixin chjana conixin joachaxian soixin, co joarinda na jian. Ni ná de jehe na vitjanha na, jeha vitján tti jiquininxin vitján para que tsonhe tti ndaᵑho ngain tti jitaxin Palabrá soixin.

¹³Jai janha osaso tti ttjen soixin. Co rrindaᵑhjan cain cosa jihi jaxon que ᵑa rrihi ngataha nontte jihi para que jehe na ᵑajeho rroché na inchin janha chahna. ¹⁴Janha chjaha na joajná soixin, pero chojni que icha rinao jeha cosa de ngataha nontte toñao na ngain chojnina ixin chojnina rinaoha na jeha cosa de ngataha nontte inchin janha cai rinaoha jeha cosa de ngataha nontte.

¹⁵Janha jeha rrinttatsanha ñao soixin que santsjexin jehe na de ngataha nontte jihi, jeha rrinttatsanha ñao ixin tanᵑhlandaha jehe na

ngain inchínji. ¹⁶ Jañá inchin janha rinaoha jeho cosa ngataha nontte, jamé jehe na cai rinaoha na jeho cosa de ngataha nontte. ¹⁷ Dantsjenda jehe na de ngain cain cosa jianha co nchecoene na tti ndoa; tti joajná soixin, mé tti ndoa. ¹⁸ Inchin rroanha na janha ngayé tti chojni de ngataha nontte, jamé janha cai rrorroanha jehe na ngayé tti chojni de ngataha nontte. ¹⁹ Janha rrinttaha jeho inchin soixin rinao para que jehe na cai sinchehe na jeho inchin soixin rinao, co sinchehe na mé ixin chonxin na tti ndoa.

²⁰ Pero joatotsenhe ñao jihi jeha para jeho jehe na, cai para ixin cain chojni que sitticaon na después, are chojni mé tsinhi na tti joajna que chojni tehe sicao. ²¹ Janha danchia nganji soixin que cainxin jehe na sintte na inchin nacoa chojni, inchin soixin ttjen nganji na co janha rrihi nganji soixin, que jehe na sintte na nganji ján na para que tti chojni de ngataha nontte sitticaon na que soixin rroanha na janha. ²² Janha jointtasayá jehe na inchin soixin nchesayana janha para que jehe na sintte na inchin nacoa chojni, jañá inchin soixin co janha xajeho nacoa na. ²³ Janha ngain jehe na, co soixin nganji na para que jehe na sintte na mero ndoa nacoaxinxon na, co jamé chojni de ngataha nontte tsonohe na que soixin rroanha na janha, co soixin anto rinao jehe na inchin rinao na janha.

²⁴ Padre, soixin tti chjana jehe na co rinaho que jehe na sintte na nganji na tti janha sarihi para que jehe na sicon na que xén soixin nchesayana janha ixin soixin joinao na desde icha saho que vehe nontte. ²⁵ Padre soixin que anto jian, tti

chojni que icha ncheřoxinhi cosa de ngataha nontte chonxinha na de ngain ansean soixin, pero janha chonxin, co chojni tehe onohé na que soixin rroanha na janha. ²⁶ Janha jointtagatsoan jehe na quensen soixin, co řa sinttaha sigue sinttagatsoan jehe na de ixin soixin para que jehe na rrochonxin na ixin soixin rinao na jehe na řajeho inchin rinao na janha, co para que janha mero sarihi ngain jehe na.

18

Are tse na Jesús

(Mt. 26.47-56; Mr. 14.43-50; Lc. 22.47-53)

¹ Are joexin ndařo Jesús cain cosa jihi, jehe conixin chojni que vacao vařhjexin na de nttiha para sacjoi na toenixin ná tsaga que dinhi Cedrón. Nttiha vehe ná huerta, tti joigaha Jesús conixin chojni que vacao. ² Cai Judas, tti joindařo para tse na Jesús, jehe vechonxin ngain lugar mé ixin tsje nttiha Jesús conixin jehe cjoi na ngain lugar mé conixin cain icha chojni que vacao Jesús. ³ Co Judas cjoi nttiha conixin anto tsje xisoldado conixin icanxin xipolicié nihngo icha importante que vintterroanha xifariseo co xidána que vaquetonha ngain icha xidána. Cjoi na nttiha conixin nttá co joicao na canxion cosa inchin candil para joinchengasanxin na, co icanxin na joicao na jecho nttá conixin mecha ngain con nttá. ⁴⁻⁵ Co Judas, tti joindařo para tse na Jesús, nttiha joí ngayehe na cai. Pero Jesús ovenohe cain tti jehe tsonhe, mexinxin jehe vařhjeyé co ndařo ngain na:

—¿Quensen tettjé ra?

Jehe na ndaĉho na ngain:

—Jesús de Nazaret.

Jesús ndaĉho ngain na:

—Mé, janha.

⁶ Co are Jesús ndaĉho: “Mé, janha”, jehe na vint-teguixinto na co hasta vintteguinttji na ngataha nontte. ⁷ Cottimeja Jesús cjan joanchianguihi na ndaĉho:

—¿Quensen tettjé ra?

Co jehe na ndaĉho na:

—Jesús de Nazaret.

⁸ Cottimeja Jesús ndaĉho ngain na:

—Ondattjo ra que janha. Si tettjé ni ra janha, tanĉhanda ra chojni tehe satsji na.

⁹ Jihi joiconhe inchin ndaĉho Jesús: “De tti chojni que jehe Ndo chjana Ndo, ni ná na vitjanha na.”

¹⁰ Cottimeja Simón Pedro vechonda ná espada, co jehe joantsje espada mé co conĉhinjiji ndatsjoen lado jian ná tti vinhi Malco, mé ná tti nchehe xé xidána icha importante. ¹¹ Pero Jesús ndaĉho ngain Pedro:

—Cjan ttín espada lugué espada. Si Ndodana ndaĉho Ndo que janha anto tangui tsonna jaxon, mexinxin janha chonda que tsonna.

Jesús ngain Anás

(Mt. 26.57-58; Mr. 14.53-54; Lc. 22.54)

¹² Cottimeja cain xisoldado que cjoí conixin xicomandanté xa co xipolicié chojni judío, cain nimé tse na Jesús co coia na. ¹³ Cottimeja sajoicao na Jesús para ngain nchiandoha Anás. Anás mé icha saho cjoí tti dána icha importante, co mé ndonché Caifás, tti dána icha importante tiempo

mé. ¹⁴ Caifás jihi tti ndačho ngain chojni judío que icha jian para ixin jehe na si senhe nacoa xí para ngoixin nación.

Pedro ndačho ixin jehe chonxinha Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro co iná de tti chojni que vacao Jesús terroé na Jesús. Co jehe Anás, tti cjoí dána icha importante are icha saho, jehe mé vechonxin tti iná chojni que joicao Simón Pedro. Mexinxin joixinhi jehe chojni mé conixin Jesús ngain patioe nchiandoha jehe Anás. ¹⁶ Pero Pedro ndavittohe ndojaxin de puerté patio mé. Mexinxin vačhje tti iná chojni mé co nichjé tti nčhí que jinda puerta nttiha para xanxinhi nčha Pedro. ¹⁷ Cottimeja jehe tti nčhí mé joanchianguihi nčha Pedro, co ndačho nčha:

—¿Ajeha jaha ná de tti chojni que xicao xí jiha?

Pedro ndačho:

—Nahi, jeha janha.

¹⁸ Ixin rato mé anto quin, mexinxin canxion xinchehe xé Anás co xipolicié nihngo dicjaga xa xohi, co nttiha tatengattjen xa texixohi xa. Pedro cai nttiha jixixohi ngayé xa ngaca xohi mé.

Anás joanchianguihi Jesús

(Mt. 26.59-66; Mr. 14.55-64; Lc. 22.66-71)

¹⁹ Jehe Anás coexinhi joanchianguihi Jesús ixin quecá chojni vacao Jesús co quehe vanchecoenhe Jesús chojni. ²⁰ Jesús ndačho:

—Janha ndačhjan ngayé chojni ngoixin mundo. Janha cainxin tiempo jointtacoán chojni ngain icha nihngo co ngain nihngo icha importante, tti xatte cainxin chojni judío, jañá janha jeha jimao

ndačhjan. ²¹ ¿Quedonda danchianguina janha? Danchianguihi cain tti chojni que coinhi tti janha ndačhjan, co jehe na rrondačo na de ixin quehe ndattjan na. Jehe na nohe na tti janha ndačhjan.

²² Are Jesús ndačo jihi, ná de tti xipolicié nihngo icha importante que te nttiha xanguí xa Jesús ná manazo rroha Jesús co ndačo xa ngain:

—¿Ajañá ndache tti dána icha importante?

²³ Jesús ndačo ngain xa:

—Si ndačhjan ná cosa que jí jianha, jaha ndačo que xenxin jixin jianha; pero si tti ndačhjan janha jí jian, ¿quedonda donhe na?

²⁴ Cottimeja Anás rroanha Jesús ngain Caifás, tti dána icha importante tiempo mé. Co xa vechia Jesús.

*Pedro ndačo iná ixin jehe chonxinha Jesús
(Mt. 26.71-75; Mr. 14.66-72; Lc. 22.58-62)*

²⁵ De cainxin mé, Pedro xa tajingattjen jixixohe ngandehe xohi, co joanchianguihi na co ndačo na ngain:

—¿Ajeha jaha ná de tti chojni que xicao xí jiha?

Co Pedro ndačhoha ixin ján, jehe ndačo:

—Nahi, jeha janha.

²⁶ Cottimeja ná de tti nchehe xé Anás, jehe tti nchehe xa mé xa ichó tti xí que Pedro cončhinjihi ndatsjoen, jehe tti nchehe xa mé ndačo ngain Pedro:

—¿Apoco viconha janha jaha conixin jehe xí yá are ngagaha nttattochjoin?

²⁷ Pedro ndačo iná ixin nahi, co rato mé tsje ná conttaxichia.

Jesús ngain Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Cottimeja sajoicaoxin na Jesús de nchiandoha Caifás para ngain palacioe xigobernador. Co rato mé ocoexinhi vingasán, pero chojni judío joixinha na palacio. Si jehe na rrojixinhi na palacio mé, jehe na rroguintte na roaha inchin costumbre que vinttechonda na co čoha rrojine na ngain tti quiai pascua. ²⁹ Mexinxin Pilato vačhje para nichjé na, co ndačo ngain na:

—¿De quehe tjanguihi ra xí jihi?

³⁰ Jehe na ndačo na:

—Si jehe xa jeha ná chojni que nchehe tsje cosa jianha, janha na rrojiquianha na xa nganji.

³¹ Cottimeja Pilato ndačo ngain na:

—Sattjiho ra xa jaha ra, co jaha ra nchejuzguehe ra inchin ttetonha ley que chonda ra.

Chojni judío ndačo na:

—Pero janha na chojni judío na, co chondaha na joachaxin para nasoenxon na ni ná chojni.

³² Jañá joiconhe inchin ndačo Jesús de ixin quexén jehe chonda que senhe. ³³ Pilato cjan joixinhi palacio, co jehe vayé Jesús co joanchianguihi co ndačo:

—¿Ajaha tti Rey de chojni judío?

³⁴ Jesús ndačo ngain:

—¿Ajaho řaxaon danchiangui jihi, ni ixin iná chojni ndattjo de ixin jamé na janha?

³⁵ Pilato ndačo:

—¿Apoco janha judío na? Chojni nacioan jaha co xidána que vaquetonha ngain icha xidána, nimé ni joicoho nttihi. ¿Quehe joinchehe?

³⁶ Cottimeja Jesús ndačo:

—Tti janha ttetonha jeha nttihi ngataha nontte. Si rrocji de nttihi, cottimeja cain chojni que vitticaon na janha rroguittoexinha na para que janha rrotse na chojni judío. Pero tti janha ttetonha jeha nttihi.

³⁷ Cottimeja Pilato ndačo:

—¿Ajaha tti rey remé?

Jesús ndačo:

—Ján, janha rey na inchin jaha ndačo. Janha concjina co joihi ngataha nontte jihi para ndačhjan tti ndoa. Cainxin chojni que ditticaon tti ndoa, jehe na ttinhi na tti ndačhjan.

³⁸ Pilato ndačo ngain Jesús:

—¿Quexehe tti ndoa mé?

Are ndačo na ixin Jesús chonda que ndasenhe (Mt. 27.15-31; Mr. 15.6-20; Lc. 23.13-25)

Are joexin joanchiangui Pilato jihi, jehe vačhje iná para nichjé chojni judío co ndačo ngain na:

—Janha xonhi jianha dittjá xí jihi. ³⁹ Pero jaha ra chonda ra costumbre que ttetonna ra ngain quiai pascua para que janha tančhjanda quexeho ná de tti teaxinhi. Mexinxin ¿arinao ra que janha tsančhjanda satsji tti Rey de ngain chojni judío?

⁴⁰ Cottimeja cainxin na cjan coyao na co ndačo na:

—¡Mé nahi! ¡Icha jian tančhjanda Barrabás!

Co Barrabás jihi jehe ná tti chehe.

19

¹ Cottimeja Pilato coetonha para vicaon Jesús.

² Mexinxin xisoldado coentaha xa já Jesús ná corona de nchaha, co joinchengá xa Jesús ná lontto morado inchin lonttoe ná rey. ³ Cottimeja

vintteconchienne xa ngaca Jesús co cjoanoa xa ndache xa:

—¡Viva tti Rey de chojni judío!

Co xanguí xa manazo ngá con Jesús.

⁴ Cottimeja Pilato cjan vačhje iná, co ndačo ngain na:

—Tsjenxin ra, janha santsje xa nttihi para que sicon ra que janha ni ná cosa jianha dittjaha ngain xa.

⁵ Co vačhje Jesús conixin tti corona de nchaha ngataha já co jingá jehe tti lontto morado. Cottimeja Pilato ndačo ngain na:

—Nttihi jí xa.

⁶ Are vicon xipolicié nihngo icha importante co xidána que vaquetonha ngain icha xidána, vinttecoyao xa co ndačo xa:

—¡Nchecrucificá xa! ¡Nchecrucificá xa!

Pilato ndačo ngain na:

—Sattjiho ra xa co jaha ra nchecrucificá ra xa ixin janha dittjaha ni ná cosa jianha ngain xa.

⁷ Pero chojni judío ndačo na:

—Janha na chonda na ná ley co jitaxin ngain ley mé ixin xí yá chonda que senhe xa ixin ndačo xa que jehe xa Xenhe Dios.

⁸ Are coinhi Pilato jihi, jehe icha xáon. ⁹ Jehe cjan joixinhi palacio, co joanchianguihi Jesús co ndačo:

—¿Quexén dinhi rajná jaha?

Pero Jesús ixonhi ndačo.

¹⁰ Cottimeja Pilato ndačo ngain:

—¿Quedonda tencoa jaha nganji na? ¿Anoaha que janha chonda joachaxin para sinttacrucificá

jaha, co janha chonda joachaxin cai para que tsančhanda satsji jaha?

¹¹ Jesús ndačo ngain Pilato:

—Jaha rrochondaha ni ná joachaxin para ixin janha si Dios rrochjaha joachaxin mé. Mexinxin tti chojni que joiquinha nganji jaha, nimé ni icha tsje jianha teca que jaha.

¹² Ngain rato mé Pilato cjoé quežén rrojinchehe para rrocanchjanda Jesús sarrocji, pero chojni judío coyaotte na co ndačo na:

—¡Si tsančhanda Jesús satsji, jaha jaha amigoe xiemperador César que ttetonha ngain tsje nación! ¡Quexeho chojni que doan rey, chojni mé jaha amigoe xiemperador!

¹³ Cottimeja Pilato are coinhi jihi, jehe vačhjecahe Jesús para ndoja co jehe Pilato vetaha tti lugar que vinhi tribunal, co ngain nguigoa hebreo lugar mé vinhi Gabata, co rročo lugar que diguittexin žo. ¹⁴ Nchanho mé cjoí víspera de ngain tti nchanho que nchejogaha na are ngain tti quiai pascua. Co mé conhe inchin ngosine nchanho. Cottimeja ndačo Pilato ngain chojni judío:

—¡Nttihi chonda ra tti rey de jaha ra!

¹⁵ Pero jehe na coyao na co ndačo na:

—¡Jehe chonda que ndasenhe! ¡Jehe chonda que ndasenhe! ¡Nchecrucificá!

Pilato ndačo ngain na:

—¿Apoco janha sinttacrucificá tti rey de jaha ra?

Pero xidána que vaquetonha ngain icha xidána vinttendačo xa:

—Janha na chondaha na icha rey que jeha xiemperador César que ttetonha ngain tsje nación.

¹⁶ Conixin jehó jihi, Pilato joanjo Jesús ngain jehe na para goan crucificado, co jeha na sajoicaoxin na Jesús de nttiha.

Are Jesús goan crucificado

(Mt. 27.32-44; Mr. 15.21-32; Lc. 23.26-43)

¹⁷ Co Jesús de nttiha vačhjexin coame crué para sajoicao na ngain tti lugar que vancheguinhí na Nttalorojá Chojni, co ngain nguigoa hebreo vinhi Gólgota. ¹⁸ Nttiha joinchecrucificaxin na Jesús, co are joinchecrucificá na Jesús, joinchecrucificá na iyó xí cai, naná xa cada lado, co Jesús vehe ngosine. ¹⁹ Pilato coetonha vehe nganito cruz ná letra que ndačho: “Jesús de Nazaret, Rey de chojni judío.” ²⁰ Co tsje chojni judío tsjehe na letra mé ixin tti lugar que joinchecrucificaxin na Jesús vehe chian ngaca ciudad de Jerusalén co letra mé vetaxin ngain nguigoehe hebreo, co griego, co latín. ²¹ Mexinxin xidána que vaquetonha ngain icha xidána de chojni judío vinttendache xa Pilato:

—Ttentaxinha “Rey de chojni judío”; icha jian ttentaxin, “Tti ndačho ixin jehe Rey de chojni judío.”

²² Pero Pilato ndačho ngain xa:

—Tti janha coentaxin, jañá sittohe.

²³ Are xisoldado joexin joinchecrucificá xa Jesús, cottimeja canoi xa chjeyehe xa lonttoe Jesús. Cottimeja coá xa camisé Jesús, co camisa mé xonhi tti ditsexinxin chó manta, jehó nacoa pieza camisa mé. ²⁴ Mexinxin xisoldado ndache chó xa:

—Tsinchjeha na camisa, icha jian dantsje na suerte de ixin jehe camisa para socon na quensen sittoehé camisa.

Jañá joiconhe tti jitaxin ngain Palabré Dios que ndačo: “Chjeyehe na lonttona, co joantsje na suerte de ixin jehe lontto.” Jehe jihi tti joinchehe xisoldado.

²⁵ Ngaca crué Jesús nttiha vehe janné, co nñichó janné, co María, tti cjoí čhihi Cleofas, co María Magdalena. ²⁶ Are Jesús vicon janné tajingattjen jan nttiha, co ngaca jan tajingattjen tti chojni que vacao Jesús que jehe anto joinao, Jesús ndačo ngain janné:

—Yá rrichonda xitsiha.

²⁷ Cottimeja ndačo Jesús ngain chojni mé:

—Yá chonda janná.

Co rato mé jehe chojni mé vayé jehe janné Jesús inchin janné jehe, co jamé vayaconhe jehe janné Jesús.

Are ndavenhe Jesús

(Mt. 27.45-56; Mr. 15.33-41; Lc. 23.44-49)

²⁸ Después de cain jihi, are Jesús conohe que cainxin oconhe, co para xettexin conhe tti jitaxin ngain Palabré Dios, Jesús ndačo:

—Venhe na jinda.

²⁹ Nttiha vehe ná chi que veche de vino que dicjan inchin vinagre; cottimeja nttiha xanguí ná de xisoldado ná cosa que dinhi esponja, co cosa mé tse jinda inchin chjon algodón, co coencjin xa cosa mé con ná ntté nttahisopo co tsín xa hasta ngain rroha Jesús. ³⁰ Jesús vihi jehe vino san mé, cottimeja ndačo:

—Cainxin oconhe.

Cottimeja joinchesé já co ndavenhe.

Ná xisoldado conxiré xa nttanttacoin Jesús conixin lanzé xa

³¹ Nchanho mé cjoí víspéra de tti quíai pásua, co chojni judío joinaoha na para canio cuerpo mé rroguíttohe nganito cruz ngain nchanho que vanchejogaha na ixin jehe nchanho que vanchejogaha na, mé nchanho anto santo. Mexinxin ndache na Pilato que jehe tsetonhe xisoldadoe ixin tsondai xa rotté tti chojni que te crucificado para que chojni mé ndasenhe icha daca, co sint-tjianxin xa cuerpoe de nttiha. ³² Cottimeja xisoldado vinttecji xa co condai xa rotté tti saho, co cai rotté tti iná, cayoixin tti vintte crucificado conixin Jesús. ³³ Pero are vintteconchienhe xa ngain Jesús, vicon xa que jehe ondadiguenhe, co mexinxin icondaiha xa rotté Jesús.

³⁴ Pero masqui jehe ondavenhe, ná de tti xisoldado mé conxirehe xa nttanttacoin Jesús conixin ná lanza, co rato mé vačhjedoho jni co jinda.

³⁵ Janha tti cjin na jihi co vicon cain jihi co ndačhjan tti ndoa. Co janha chonda seguro que ndačhjan tti ndoa para que jaha ra cai sitticaon ra.

³⁶ Ixin cain cosa jihi conhe para joiconhe inchin jitaxin ngain Palabré Dios que ndačo: “Condaiha na ni ná nttaloroe.” ³⁷ Co jí iná parte que ndačo: “Sicon na tti joinchenihi na.”

Are xavá Jesús

(Mt. 27.57-61; Mr. 15.42-47; Lc. 23.50-56)

³⁸ Después de cain jihi, José, tti joixin rajna Arimatea, joanchiehe joachaxin Pilato para sajoicao cuerpoe Jesús. José mé cjoí ná chojni que vitticaon

Jesús, pero jehe joinaoha para conohe icha chojni que jehe vitticaon ixin vařagoen José chojni judío que vinttechonda joachaxin. Pilato chjé José joachaxin, mexinxin jehe cjoí co sajoícao cuerpoe Jesús. ³⁹ Cai Nicodemo, tti joinichjé Jesús ngain ná ttie, jehe mé cjoí conixin ná cantte kilo de mirra co áloes, cayoi mé diguittecjan. ⁴⁰ Co José co Nicodemo coensiha na cuerpoe Jesús conixin venda que anto ĉhjoin řajni de ixin tti cayoi cosa que joícao Nicodemo. Co coensiha na cuerpoe Jesús inchin vanchehe chojni judío are vacjavá na chojni que ndavaguenhe. ⁴¹ Ngain lugar tti joinchecrucificaxin na Jesús nttiha vehe ná huerta de nttattochjoin, co ngain huerta mé vehe ná cueva naroaxin que řa řonhi cuerpo diguenhe dixanxinhi na nttiha. ⁴² Nttiha coín na cuerpoe Jesús ixin cueva mé chiaon vehe co ixin otsexinhi tti nchanho que nchejogaha chojni judío.

20

Are xechon Jesús

(Mt. 28.1-10; Mr. 16.1-8; Lc. 24.1-12)

¹ Ngain nchanho domingo María Magdalena cjoí ngain cueva mé atto ndoyo are řa naxion xehe, co vicon que icoha tti řo que vejé cueva mé.

² Cottimeja coinga sacjoi tti vehe Simón Pedro co iná de tti chojni que vacao Jesús, tti chojni que Jesús anto joinao, co ndaĉho ngain na:

—Sadijicaoxin na de ngain cueva cuerpoe Jesús, co noaha na ttinó coín na cuerpo.

³ Cottimeja Simón Pedro co tti iná chojni vaĉhje na co cjoí na ngain cueva mé. ⁴ Cayoixin na

tettinga na nataonxin, pero tti iná icha coinga que Pedro, co jehe mé tti icha saho joiiji ngain cueva mé. ⁵ Visé tsjehe co vicon jeho venda tate nttiha, pero jehe joixinha. ⁶ Cottimeja joiiji Simón Pedro, co jehe vixinhi cueva mé. Jehe cai vicon jeho venda tate nttiha, ⁷ co cai vicon tti manta que gonda para vesia já Jesús, ijiha manta conixin venda, jehe manta dixea manta co ndaha jí manta. ⁸ Cottimeja vixinhi tti iná chojni cai, tti joiiji icha saho ngain cueva mé, co vicon tti diconhe, co jehe vitticaon, ⁹ masqui jehe na xa coinxinha na tti jitaxin Palabré Dios que Jesús chonda que rroxechon de ngayehe nindadiguenhe. ¹⁰ Cottimeja cayoi chojni mé sacjan na para nchiandoha na.

*Are Jesús xago ngain María Magdalena
(Mr. 16.9-11)*

¹¹ Pero María Magdalena nttiha vittohe ndoja ngaca cueva mé, co jitsjanga. Co are jitsjanga visé para tsjehe ngaxinhi cueva mé, ¹² co jehe vicon yó ángel que tengá lontto roa co tate tti vehe cuerpoe Jesús. Ná de jehe tají tti vehe já Jesús co iná tají tti vehe rotté Jesús. ¹³ Co cayoi ángel mé joanchianguihi María co ndačo:

—¿Quedonda rritsjanga?

Jehe María ndačo:

—Ixin sajoicao na cuerpoe Jesús, co nonaha ttinó coín na.

¹⁴ Are joexin ndačo yá, cjoendoa já co vicon Jesús que nttiha tají pero jehe venoeha ixin jehe Jesús. ¹⁵ Cottimeja Jesús joanchianguihi:

—¿Quedonda rritsjanga? ¿Quensen rrittjé?

Jehe María xaxaon que puede xí mé tti jinda nttattochjoin nttiha co ndačo ngain:

—Si soixin sacjoiho cuerpo que vehe nttihi, ndachjenji na ttinó cointtohe cuerpo para que janha sirroá cuerpo co satsjinha cuerpo mé.

¹⁶ Cottimeja ndačo Jesús ngain:

—¡María!

Co jehe María cjan, co ndačo ixin nguigoa hebreo ngain Jesús:

—¡Raboni!

Co raboni rročo Maestro.

¹⁷ Jesús ndačo:

—Tančjanda na ixin xa tajinha ngain tti jí Nodana. Pero ttji co ndache cain chojni que vacjinha que janha tsajín ngain tti ttjen Nododana co Nododá jaha ra cai, tti Dios de janha co Dios de jaha ra.

¹⁸ Cottimeja María Magdalena joiquetonhe cain chojni que vacao Jesús ixin jehe María vicon Jesús, co ixin jehe Jesús ndache María para ixin rrondačo ngain na.

Jesús xago ngain chojni que vacao

(Mt. 28.16-20; Mr. 16.14-18; Lc. 24.36-49)

¹⁹ Ngain xajeho nchanho mé, tti nchanho domingo, are ottie, canxion chojni que vacao Jesús tate na ngain ná nchia co jian diquejé na puerté nchia mé ixin vařagoen na chojni judío. Co rato mé Jesús xago ngayé na, co jehe joanjo joajna ngain na, co ndačo:

—Dayehe ra tti čhjoin que tsonohe ansean ra.

²⁰ Co are joexin ndačo jihi, jehe cjoago ngain na rá jehe co nttanttacoin tti conihi. Co jehe na ché

na ixin vicon na Jesús iná. ²¹ Cottimeja Jesús cjan ndačo ngain na:

—Dayehe ra tti čhjoin que tsonohe ansean ra. Inchin rroanha na Nnodana, jamé janha rrorroanha jaha ra cai.

²² Cottimeja Jesús vanottetaon na co ndačo ngain na:

—Dayehe ra Espíritu Santo. ²³ Cain chojni que jaha ra sinchetjañehe ra tti jianha que jehe joinchehe, jamé ndasitjañehe ixin cai Dios ndasinchetjañehe chojni mé; co cain chojni que jaha ra sinchetjañeha ra, jamé řa sitjañeha chojni mé ni de ngain Dios.

Tomás vicon ixin Jesús dixechon

²⁴ Pero Tomás, mé ná de tti tteyó chojni que vacao Jesús, tti vancheguinho na Xancoata, jehe mé coha ngain na are cjoí Jesús. ²⁵ Pero tti icanxin chojni que vacao Jesús ndačo na ngain:

—Janha na vicon na Jesús.

Pero jehe Tomás ndačo ngain na:

—Si siconha janha ngá rá tti joidoho clavo, co rrořanxinha dedona nttiha, co rrořanxinha rana ngain nttanttacoín, janha čhoha sitticanho.

²⁶ Vatto jni nchanho de mé co cain chojni que vacao Jesús cjan na ngain nchia iná, co are mé nttiha vehe Tomás ngain na cai. Co masqui cain puerta tatejé jian, Jesús joixinhi, joiguehe ngayé na co joanjo joajna ngain na co ndačo:

—Dayehe ra tti čhjoin que tsonohe ansean ra.

²⁷ Cottimeja ndačo ngain Tomás:

—Tsjenxin rana, co xanxinhi dedoa nttihi; co xanxinhi rá ngain nttanttacoín na. Ixaxaonha ixin ndoaha, pero ditticaon nganji na.

²⁸ Cottimeja Tomás ndačo:

—¡Soixin tti chonda cain joachaxin, co soixin tti Dios de janha!

²⁹ Jesús ndačo ngain:

—Tomás, janché ditticaon ixin vicon na. Icha çhjoin vidé tti chojni que diconha na janha co masqui jamé jehe na ditticaon na.

Quedonda Juan dicjin libro jihi

³⁰ Jesús joinchehe anto tsje señal que vicon chojni que vacao jehe, pero cainxinha señal mé jitaxin ngain libro jihi. ³¹ Pero cain jihi jitaxin para que jaha ra sitticaon ra que Jesús mé tti Cristo que Dios rroanha, co jehe mé Xenhe Dios, co para que rrochonda ra iná vida naroaxin que xonhi tiempo tsjexin are sitticaon ra jehe.

21

Jesús xago ngain yáto chojni que vacao

¹ Después de cain jihi, Jesús cjan xago iná ngain chojni que vacao are ngandehe lago que dinhi Tiberias. Janhi conhe: ² tate yáto na, Simón Pedro; Tomás, tti Xancoata; Natanael, tti joixin rajna Caná de Galilea; co cayoi xitsihi Zebedeo; co iyó chojni que vacao Jesús. ³ Simón Pedro ndačo ngain na:

—Janha sitse copescado.

Cain jehe na ndačo na ngain:

—Janha na cai tsjin na.

Jañá savinttecji na coani na ná barco, pero ttie mé xonhi copescado tse na. ⁴ Co are ocoexinhi vingasán, Jesús xago ngandehe jinda, pero cain chojni mé venoeha na ixin jehe Jesús. ⁵ Cottimeja Jesús ndačo ngain na:

—¿Axa xonhi copescado tse ra?

Co jehe na ndačo na:

—Xa xonhi va.

⁶ Cottimeja Jesús ndačo ngain na:

—Dancahngui ra nonchaha lado jian de barco, co rrotse ra va.

Co jamé joinchehe na, cottimeja ndoa hasta ni ichoha dantsjengui na nonchaha de ngangui jinda ixin anto tsje copescado vingachjian nonchaha. ⁷ Cottimeja tti chojni que Jesús anto joinao, mé ndačo ngain Pedro:

—¡Jehe Jesús!

Nandá coinhi Simón Pedro yá que ixin jehe Jesús, jehe Pedro jaicoa vingá lonttoe, lontto jidatexin ixin jehe joantsje lontto, co coataonhe jinda. ⁸ Co rato mé tti icha chojni que vacao Jesús xa vittohe na inchin cien metro cjinxin de ngandehe jinda. Cottimeja jehe na joí na ngandehe jinda conixin barco que jittianganji nonchaha jicaontja copescado. ⁹ Are ojoí na ngandehe nda ngataha jinche, vittja na ná montochjan de xoittja conixin ná copescado ngataha xohi, co niottja. ¹⁰ Jesús ndačo ngain na:

—Sicoho ra canxion copescado que tse ra jaxon.

¹¹ Simón Pedro cjan ngain barco para joica nonchaha que jiringa copescado co jehe coianganji nonchaha mé hasta tti ngandehe lago co nttiha

jiringa de joxon copescado yeye hasta ciento cincuenta y tres va. Co masqui anto tsje va, vichjeha nonchaha. ¹² Cottimeja Jesús ndačo ngain na:

—Āacoi ra jintte ra.

Co ni ná de jehe nimé ŋaxaonha na para joanchianguihi na Jesús ixin quensen jehe ixin venohe na que jehe Jesús. ¹³ Cottimeja Jesús conchiennehe, co jehe coá niottja co joanjo nio ngain jehe na, co cai copescado.

¹⁴ Jihi ninxin nttiha que ŋago Jesús ngain chojni que vacao después de xechon.

Jesús nichja ngain Pedro

¹⁵ Are joexin joine na, Jesús joanchianguihi Simón Pedro co ndačo:

—Simón, xitsihi Jonás, ¿arinao na janha icha que nitehe?

Pedro ndačo:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco dicao cuidado de ixin jehe va.

¹⁶ Yoxin nttiha, Jesús joanchianguihi iná co ndačo:

—Simón, xitsihi Jonás, ¿arinao na janha?

Pedro ndačo ngain:

—Ján, soixin noha que ján rinaho.

Jesús ndačo:

—Mexinxin jaha darinda chojnina, jañá inchin tti ttingaria coleco ciudado de ixin jehe va.

¹⁷ Ninxin nttiha joanchianguihi Jesús co ndačo:

—Simón, xitsihi Jonás, ¿arinao na?

Pedro tavechín ixin Jesús joanchianguihi ninxin nttiha ixin arinao jehe Pedro Jesús. Co Pedro ndačo ngain Jesús:

—Soixin noha cainxin. Soixin noha que janha ján rinaho soixin.

Jesús ndačo ngain:

—Mexinxin darinda chojnina, jañá inchin tti ttingaria coleco dicao ciudadano de ixin jehe va. ¹⁸ Janha rrindattjo ndoa que jaha are xa joarihi icha chjan, jaha vaguitoxinha co savacji tti jaha vajinao, pero are otsonttaxí, jaha tsinxe rá co oje ni sinttangá lonttoa, co tsjiho na tti jaha sinaoha tsji.

¹⁹ Are Jesús ndačo jihi, jehe jinchequinxin na ixin quexén senhe Pedro, co ixin jehe Pedro jañá sinchesayehe Dios. Cottimeja ndačo Jesús ngain Pedro:

—¡Jaha nchehe sigue ditticaon na!

Tti chojni que Jesús anto joinao

²⁰ Are Pedro ngaria, jehe vicon que nttiha jirroé tti chojni que Jesús anto joinao, xajeho tti vehe ngaca Jesús are joine na ngain quiai pascua co joanchiangui ngain Jesús co ndačo: “Soixin, ¿quexehe tti tsjagoe chojni que ningaconha ttinó ttjen soixin?” ²¹ Co are Pedro vicon jehe mé, jehe Pedro joanchianguihi Jesús co ndačo:

—Xí jihi, ¿quexén tsonhe xa?

²² Jesús ndačo ngain Pedro:

—Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán? Jaha nchehe sigue ditticaon na janha.

²³ Mexinxin xaxaon icha chojni que vacao Jesús que ixin jehe mé rroguenha. Pero Jesús ndačhoha ngain Pedro ixin chojni mé rroguenha, Jesús jecho ndačho que: “Si janha rinaho que jehe xa sechon xa hasta que are janha rrocjan na sihi iná, ¿jaha quehe ndosán?”

²⁴ Jehe chojni mé, mé tti janha, co janha tti vicon cain cosa jihi, co cjin na cain jihi. Co noa na que ndačhjan ndoa.

²⁵ Cai jí icha cosa que Jesús joinchehe, pero si rroguetaxin ná co ná cosa mé, janha xaxanho que ngoixin mundo rroguittjaha rroguingachjian cain libro que rroguetaxin cain cosa mé. Amén.

Tti jian joajné Jesucristo **New Testament in Popoloca, San Marcos Tlalcoyalco**

copyright © 1982 Wycliffe Bible Translators, Inc.

Language: San Marcos Tlalcoyalco Popoloca (Popoloca, San Marcos Tlalcoyalco)

Translation by: Wycliffe Bible Translators, Inc.

Popoloca, Tlalcoyalco [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyalco

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

a23ba35e-b016-5f67-a705-694e460cf18a